

12

DE LITE RARVM LVDIS

RECTE APERTIEN-
DIS LIBER.

Iconis



ARGENTORATI APVD VVEN
delinum Rihelium.

1539



IOANNIS

STURMI AD

Prudentissimos viros, ornatissimos homines,
optimos ciues, Iacobum Sturmium, Nicola-
um Cnipsium, Iacobum Meierum, de
literarum ludis recte aperi-
endis, liber.

De Literarum utilitate.



D nonas Martij, cum audiretur,
factum esse Senatuscons. quo vo-
bis emendatio puerilis discipli-
nae, et institutio ludi noui manda-
ta esset, incredibilis laticia data est uiris bonis. Ac-
quoniam uos huius instituti autores estis, propè om-
nes ad uos pertinent et gratulationes & laudes. Ete-
nim uos eam rem ad Senatum detulistis, uobis Sena-
tus eadem de re quod uideretur statuendi potesta-
tem fecit, uos constituistis, à uobis suscepta res est, à
uobis instituta & confirmata, uos fundamenta ieci-
stis salutaris decreti, & sanctissimæ disciplinae. Mul-
ta enim homines à natura communia uicia habent:
enagna nobiscum barbaries nascitur, quidam etiam
mendosi mores & etatum & nationum & studio-

Viciofi-
tas natu-
ræ huma-
næ.

DE LITERARVM LVDIS

tam, quod sunt, itaq; quicq; peculiari natura
 gunt. deniq; nostris temporibus imprudenti
 deterrimam consuetudinem ipsis moribus delapsi
 sumus, quibus mali, nisi remedia inueniantur, quid
 poterit esse in ulla repub. aut syncerum, aut diutur-
 num? Quamobrem mihi quidem necessarium certe
 uidetur in ciuitatibus ueteres disciplinas restitui,
 quæ quod aut in more, aut natura, aut consuetudi-
 ne, aut ætate, aut opinione, aut ingenio, uiciosum
 est, tributim deleant? Resp. enim recte constitutæ
 ut distinctos artifices, ita diuisas quoq; disciplinas
 habere debent: & manent adhuc in plerisq; uetusti
 moris exempla, quæ tametsi deprauata sint, tamen
 indicant, quid illi egerint, qui ante nos resp. recte cu-
 rarunt. Sed cum honestæ actiones ad omnes spectent,
 nemoq; sit quem non secundum naturam atq; uirtu-
 tem uiuere deceat: nullum tamen est hominum ge-
 nus, quod disciplinam sanctiorem ac seruicriorem in-
 stituere, & retinere debeat quam literatorum. Ni-
 hil enim est in natura rerum, quod ita mores exudi-
 at, ut literarum studia, nihil tam in omnes partes fis-
 sas utilitates habet, quàm humanitas atq; doctrina.
 Cum singulis enim priuatim propè semper ciuibus
 utile fuit habuisse liberos in artium liberalissima-
 rum disciplina uersatos, tum publice fuit, omnibus
 ad rerum conseruationem necessarium, extitisse
 nonnul-

Literato-
 rum disci-
 plina.

nōnullos, qui in periculis & discriminibus non solum utiliter, uerum etiam sapienter illis quibus fuit opus consulerent. Ac si quæ fuerunt unquam tempora, quibus resp. propter bonorum & sapientum raritatem, & malorum atq; imperitorum multitudinem, ac uarietatem conflata, plurima maximâq; pericula uiderunt, nostra certe talia sunt, quibus stulticiæ, & cupiditatis plura, quàm prudentiæ, atq; sanctimoniæ uestigia extent: At non tranquillis modo temporibus, uerum afflictis etiam rebus antiquissimæ potentissimæq; gentes, quod nos minime facimus, sapientiæ locum esse uoluerunt. Et ante tēpestates, ocijq; perturbationem literarum ac sapientiæ studia coli debent, & in ipsis fluctibus, non abijci aut opprimi, ut & ante pericula, providere mala possimus, & in ipsis difficultatibus si sint diuturnæ, consilio non destituamur. Sed fit sæpenumero, ut ne illa quidem uitemus, quæ prouidentur, quod cum dedecore ac periculo sint coniuncta: ex quo genere hominum Medea illa est.

Video meliora proboq;.

Deteriora sequor. Non multum igitur cognitio & scientia ciuitatibus adfert, nisi eodem exercitatio & uirtutis disciplina accedat, qua eadem quæ di dicimus, agere consuefcamus. Ibi enim demum uera sapientia est, ubi neq; in oratione inconstantia, neq; Sapientia

A : in opina

DE LITERARVM LVDIS

in opinatione error, neq; in actionibus dedecus ullū aut aliqua macula apparet. Ac tametsi non solum doceri uirtus, uerum etiam exerceri uelit, tamen utiles semper hominum societati extiterunt, doctores bonarum rerum, multaq; cognoscenda, priusquam uidere possimus quid agendum sit & quid deceat. Non secundum uirtutem uiuet qui ignorabit, quid commune sit omnium, quid multorum, quid propriū, quid laudabile sit in natura, quid in consuetudine honestum. Quæ enim ignorantur, & quæ uicia concipimus imprudentes, ea uitare non possumus: indicata uero & repræhensa, etiam si plurima sint, tamen detrahuntur disciplina. Sed cum tria sint, ea q; magna quæ prudentiam cum sapientia pariant, natura, & rerum usus & doctrina: duoq; illa propè omnibus hominibus sint communia, tamen eiusmodi sunt, ut nisi tertium illud hoc est doctrina & disciplina coniungatur, neq; excoli alterum, neq; alterū ad res possit adhiberi. Ingenij enim uim Deus unā cū uita nobis tribuit, neq; usus in homine nullus esse potest, cui uita longior data sit, & aliqua sit præditus industria. at utrunq; præstantius fit, si adhibeatur literarum magister, cui cū naturam bonam Deus largitus est, utilis semper & sepe salutaris ciuibus extitit: cum uero deprauatis ingenijs, literarum elegantia non recte adhibita est, ibi mala frequenter,

neq; ra-

Natura
Vsus
Doctrina.

neq; raro pernicioſa exempla prodi ſolent, Nihil enim doctrina uehementius eſt: & ad iuuandum & ad nocendum ſummas uires habet, Multi prudentes regum & tyrannorum minas contempſerunt, ſi ne moleſtijs: qui poetarum odia, & oratorum clamores non potuerunt ſuſtinere. Quamobrem non artiſcioſe ſolum, ſed ſalubriter etiam artes & diſciplinæ tradendæ ſunt, quorum utrunq; noſtris temporibus eſt uiciatum. Nam permulti neq; modum neq; ordinem in docendo talem ſequuntur, qualem res ipſa requirit, & morum non paucis in locis eiufcemodi habetur ratio, ut uicia uel non prouideantur, uel excuſentur, propter inueteratam conſuetudinē. Recte igitur Senatus noſter qui huic diſciplinæ præfectos uos eſſe uoluit, uoſq; comparauit qui uultis, qui ſtudetis, qui poteſtis quod optimū eſt libero populo conſulere. Et quoniam à uobis pars quædam mihi huius conſultationis mandata eſt, ſtatui meum conſilium & cogitationem hac ſcriptione explicare, atq; etiam aperire quod genus ludorum, optimum, & quæ docendi ratio, mihi expeditiſſima eſſe uideatur.

Quis ſtudiorum finis.

De Magiſtratu, de literarum magiſtris.

Optimum igitur ludi genus eſt, in quo & doctrinæ

DE LITERARVM LVDIS.

Doctrina
& religio

Linguae
informa-
tio,

trinae & morum ratio diligens habetur. Nam tametsi studiorum nostrorum finis sit rerum cognitio, tamen si à doctrina & literis uita dissideat, quid ut ante dictum est, utilitatis habet elegans ac liberalis institutio? Pietas igitur atq; religio in scholis propo-
sita sit, & ad eam iuuenilis animus cultura literarum erudiat. Sed rerum cognitio absq; sermonis elegantia barbara & foeda esse solet, & simul cum orationis deprauatione irrepere in homines morosam quandam uidemus sapientiae persuasionem. quare uidendum est, ut prima liberorum aetate mature ad linguae informationem dedatur. Ad loquendum enim homines quam ad cogitandum iudicandumq; promptiorem naturam habent: & quod unicuiq; aptum est, ab eo principium in erudiendo debemus ducere. Sed ut loqui ita etiam recte facere pueri facillime assuescunt. Nulla enim adhuc tum uitiorum habitudo firma coaluit, ipsaq; principio uitia depelli facilius non admissa, quam diu admissa deponi tandem possunt. Itaq; coniuncta sit linguae primis annis uitaeq; moderatio, ut quae post comparanda sunt facilius assequetur, excellentem doctrinam, & religionem: quarum altera homini necessaria est, altera huic ipsi quae est necessaria, iusta debitaeq; affingit ornamenta. Verum quod in pueriles animos insitum uolumus id etiam in horum magistris oportet

RECTE APERIENDIS.

oportet illuminatum esse, ut doctrina & pietate cæteris hominibus antecellant. Nemo enim imperitū libenter sequitur, & maior fides uiro bono quàm malo à plerisque habetur. Ac tametsi prima spes reposita sit in uirtutis atq; ingenij indole, qua pueros præditos esse oportet, altera in magistris, tamen nisi magistratus ac parentum studia coniungantur, sæpenumero diligentia præceptorum remittitur, & extinguitur in adolescentum animis industriæ oblectatio. Quare ad Reip. felicitatem pertinet, magistratum erga eos qui erudiendæ iuuentuti præficiuntur liberalitatem exercere: & priuatim domesticis rationibus utile est, patrem uelle quàm optimos esse liberos suos, eaq; in re literarum doctoribus adesse. Sed in his deligendis tria sunt spectanda, studium erga res humanas, uirtus atq; doctrina. In multis enim præclara quædam doctrinæ signa apparēt, tamen ita sunt uiciosi moribus, ut exemplo esse nō debeant, neq; pauci sunt ex bonis, qui priuatum domesticumq; ocium, publicis occupationibus præferant: quò magis uidendum est, ne doctorum diligentia, pecunia magis excitetur quàm æstimetur consideratione ingenij, & animaduersione uitæ anteaetæ. Raro enim in illis constantia & perfecta uoluntas est, quos pecunia studium prouocat, qui uero ultro incitantur, & dedecus fugiunt, his maior fides

Magistri
literarum

Magistra
tus & pa
rentes.

DE LITERARVM LVDIS

est habenda. Quocirca literarum doctores, non solum doctrinam habeant, uerum etiam uirtute præditi sint, & cupidissimi sint patriæ, & communis bonorum officij. Nam tametsi tria sint quæ animos hominum ad res præclaras excitare solent, amor honesti, & laudis auaritia, & pecuniæ studium: tamen si delectus uiri prudentes non solum dissimilibus in rebus, uerum etiam ad illa quæ eiusdem propè naturæ sunt, adhibent, est etiam in hoc loco cura suscipienda ut cum eorū facultas datur, qui optime possint præferamus semper eos, qui cum efficiendi facultate coniunctam uoluntatem studiumq; habent. Etenim laudis cupiditas etsi sæpe laudata est, tamen plurimis in locis cum uicio in quo sunt ambitiosi coniungitur. & auaricia inexhaustaq; diligentia in comparandis opibus non potest à bonis non uituperari. at excitatio animi qua sponte homines, ad uirtutem inflammantur, summorum semper uirorum retinuit cō probationem. Sed nemo bonus, qui non in cæteris quoq; uirtutis signa dari gaudeat, & sæpe in multis iniquorum ingratitude minuit industriam. Liberalitatem excellentia ingenia, & exercere uolunt, & experiri. Neq; quisquam est omnium, qui perpetuo inuitis atq; ingratis prodesse possit. Graui dolore uirtus afficitur cum se à uicio superari uidet, & quanquam dilatari concupiscit, tamen etiam tum

cum

Liberalitas magister er-
stratus er-
ga litera-
tos.

cum contracta est, habet quo se consoletur. Qui uult, qui cupit, eidem uirtus adest semper, qui uero recusat, qui contemnit, is non deseritur a quo debebat conseruari, sed per quod incolumis esse possit, aut refugit aut non amplectitur. Itaq; non solum beneuolentia habenda studiosis est, uerum etiam muneribus & quasi stipendijs afficiendi & salutaribus decretis sunt ornandi, quæ egregiæ uoluntatis solent significationem habere. Electionem igitur & liberalitatem in magistratu requirimus. Liberalitas eò extendi debet, & ut ne quid rerum necessariarum desit magistris, & ut quàm plurimi non solum doctores literarum, sed etiam parentes et adulescentes excitentur. Quæ enim honorantur, ea celebrari solent, quæ uero contempta aut neglecta iacent, hæc etiam si optima sint, tamen raros excultores habent. Deligendi uero sunt ut dictum est, qui & doctrinam tantam habent ut possint, et ea natura diuinitus ipsis data est, ut cupiant publicas commoditates amplificare.

Quis modus sit & numerus stipendiorum & unde illa petenda.

Est etiam certus numerus, & definita ratio, in dandis numerandisque stipendijs tenenda, Primo necessaria decernenda sunt, deinde ueniendū ad ea

DE LITERARVM LVDIS

ad ea quæ in amplitudinem & dignitatem conferuntur. Neccessaria uoco grammaticorum, neq; ullus locus esse debet, præsertim in Christianorum conuenticulis, ubi non sit, qui elementa latini græciq; sermonis tradat. Sed quæ ciuitates plus possunt, illæ etiam comparent, qui differendi dicendiq; artes doceant. Magnarum uero dignitas postulat, ut maiorum artium professores constituent, atq; illis qui minus possunt theologos & medicos, & iurisperitos suppeditent. Modus autem in tribuendo ita definiri potest, ut liberalitatis ratio non uioletur: ut ne quod alteri deest, in eo alter abundet & effluat. Est enim in hoc magnum signum Reip. non recte constitutæ. deinde qui necessarijs deficiunt, atq; illis carent, si ne quibus iustum in literis ocium non conceditur, sæpe coacti egestate ab officio discedunt, multa remisse, aliqua etiam auare, neq; indecore nulla & non conuenienter committunt. Numerus uero eiuscemodi constituatur: ut primo ad ciuitatis opes, & ad utilitates studiorum referatur: post etiam ad honestatem dignitatemq; ratio reuocetur. Florere itaq; eam Rempub. literarum doctrina putabo, in qua, quiq; necessarij sunt, & qui possunt ornamenta ciuibus adferre, non desunt, & in qua nemo decedit, nemo etiam intermissionem facit, qui uel successorem uel adiutorem pro se non relinquat. Quæ enim pos=
sunt ciui

sunt ciuitates statim de principio duos in utroq; genere comparent, qui doctrina excellent, & quoad possunt, efficiant, ut suis opibus perfectæ, & ipsæ suis uiribus contentæ esse uideantur; nihil etiam aliunde comparent, quod domi possint inuenire. Satis ad hanc rem quam proposuimus facultatum esset, si sacre opes recte dispensentur, atq; utinam ceteræ ciuitates nostræ Reip. exemplum sequantur, ut si omnia quæ fieri debeant, efficere non possint, tamen tantum, quantum possunt, quantulumcunq; sit, uelint elaborare. Tria sunt quæ in omni re ardua & magna sunt necessaria, unum ut uelint, alterum ut quod uolunt possint, tertium ut quod possunt, postquam susceptum opus est, efficiant. Sed medium illud paucarum magnarumq; ciuitatum est, illa uero altera ubi non sunt, ibi reprehensioni atq; uituperationi est locus. Studendum enim & prudenter conandum est, quodcunq; utilissimum ciuibus esse statuis. Opes ecclesiæ maiores nostri, ad officium cultumq; Deo & Christo summa cum reuerentia & deuotione uitæ tribuendum compararunt. Expletur autem id officium in egestate earum rerum, quibus corpus animusq; carere non potest, doctrina & beneficentia. Horrenda tempora sunt cum in eos bona Christi conferuntur, qui neq; bonitatem exercere uolunt, neq; docere possunt, & inepti sunt ad mu-

nera in

Volūtas
Facultas
Constantia.

Opes ecclesiasticæ

DE LITERARVM LVDIS

nera in Christianorum conuenticulis suscipienda: deniq; ut ne quid dicam quod grauius sit, qui ad de- honestandam, quàm ornandam religionem, aptius ingenium habent. Sed hæc de malis dico, quorum nostris temporibus nimis magnus numerus est. uti- nam boni communibus studijs excitentur ad eos depellendos, qui honestissimo omnium mortalium ordini maculas infames inurunt. Illud satis sit, si iam bonis constet ecclesiæ facultates, primum doc- trinae & egestati, deinde literis, quibus doctrina plu- rimum iuuatur, & nostro tempore necessariae sunt, esse comparatas: quam rationem si tueamur, pote- rit aliquando uetus mos, & maiorum nostrorum disciplina recuperari. Sed hæc hactenus de Magi- stratus officio, & magistrorum mercede.

Parentum officia:

Parentum etiam domestica cura, ad magistro- rum consilia debet esse aggregata. Valde enim puerilem educationem turbat, cum inter hos offen- siones extant. Ferre igitur pater debet, ut laudari, excitari, amari, sic etiam moneri, repræhendi, casti- gari liberos suos. Sic in scholis literarum, ut in ma- gno populo leges constituantur, & ita in puerili tur-
ba ad lau

ba ad laudem præmia, & ad uituperationem casti- In Scho-
gatio proponatur, quemadmodum in ciuium conuē- lis præm-
ticulis à magnis solet fieri legumlatoribus. Sed ini- a & po-
quus æstimator & iudex sæpe est amor, neq; quic- na consti-
quam, nisi à se corrigi patitur, & frequenter tametsi- tuenda.
aliud dicat, tamen odit seueriorem animaduersionem.
Il liberale est puniri, et castigari uerberibus: at
quoniam maxima pars uitiosam naturam habet, cū
necessarium est, & propter condiscipulos, dissimu-
lari non potest, & cum utile est puero, officium si-
bi parens præstari putet, si ad animum emēdandum,
corpori dolor qui aīo quam tangendi sensui graui-
or sit adferatur. Cruelitas & cupiditas in eo qui in-
stituit & docet, semper uituperari debet, & amouē Plagosi
di à literarijs ludis sunt, quicunq; ex uerberatiōe uo magistri
luptatē capiunt: sed indulgentia multas magnasq; remouen-
incommoditates secum adfert. Illi igitur ab ingenia di.
rū educatione repellēdi sunt, qui neq; in puniendo,
neq; in ignoscendo modū retinere possunt, neq; illo-
rum liberis, in studiosorū coetu uersari licitum est,
qui cōmunibus legibus nolunt obtemperare. Con-
iunctæ esse debent patris magistriq; uoluntates, ne-
q; recte in scholis obtemperatur, cum horum à pue-
ro animaduertuntur offensiones. Domesticæ etiam
occupationes, & impeditiones curarū, literarum
studia, & quæ in scholis præcipiūtur, neq; impediāt
neq; per-

DE LITERARVM LVDIS

<p>Liberum animum literæ re- quirunt.</p> <p>Amor in literas.</p> <p>Obseruã- tia erga præcep- torem.</p> <p>Otium a labori- bus.</p> <p>Honestas morum.</p>	<p>neq; perturbent. Liberum requirunt literæ, cum re- cte est excitatus, animum: cui impedimento sunt la- bores: qui tametsi corpori salubres sunt, mentem ta- men ita afficiunt, ut ad rerum consyderationem exi- stat ineptior. Sunt autem omnino quatuor quæ pa- tri elaboranda sunt pro magistro cum domi est ado- lescens. Vnum ut amorem erga literas excitet, & augeat industriam, alterum ut agnoscat filius à quo salutaria præcepta ad informandum erudiendumq; animum percepturus est, huic obseruantiam præ- standam esse: tertium ut ne pueri diligentia domesti- cis laboribus distrahatur, postremum ut in serimo- ne & corporis cultu, atq; in uictu nihil committa- tur, quod aut studia dehonestet, aut euertat ingenij a- cumen, aut quoquo modo moribus officiat. Deniq; id agere uterq; parens debet, ut quæ in scholis pro- ponuntur, quæq; ipsi tradere, aut ignoratione, aut uoluntate, aut occupatione impediti, non possunt, eadem tamen uelle & optare uideantur. Erudiet enim indoctus parens hoc modo puerum ad disciplinam,</p>
---	---

De puerorum delectu & officio.

Sed diligenter principio pueri naturam & do-
mi à parentibus, & in coetu publico ab eo, cui in
disciplinam traditus est, consyderari oportet. Neq;
enim so-

enim solum qui tardo ingenio nascuntur, à disciplinis sunt amouendi, sed multi etiam natura sunt non mala præditi, qui tamen ad literas sunt inepti. Quidam etiam naturam eximiam & illustrem habent: tamen aut ad rem militarem, aut ad Reip. curationem idonei magis sunt, quàm ad artes atq; disciplinas. Sed ut optimi medici est iudicare posse, qui cum magna spe liberorum recte matrimonium coire possint: ita etiam industrij doctoris atq; magistri est, uidere ad quam quisq; artem accomodatam naturam habeat. Sed diligentis est considerare, periti cognoscere, boni & ueri parentes commonere. Elaborare enim debet non ut quàm plurimos, sed quàm optimos habeat. Vt igitur excellens & singularis institutio atq; disciplina suscipiatur ingeniorum, ut militum delectus est habendus, neq; quisquam conscribendus, per quem te nihil effecturum speres. Corporis quidem commoditas spectanda est, sed non ita ut mentis præstantiæ præponatur. Magna enim res est, ac ualde optanda corporis, & species, & sanitas, & conformatio, sed animo nihil præclarius. Semper igitur de animo iudicium fieri debet, qui si corporis quoq; elegantia atq; figura cõmendetur, munitam magis ad labores & autoritatem uiam habet. Animi uirtutes sunt ardor in suscipiendo, studium in uestigando, acumen in percipiendo, industria

Delectus.

Animi
uirtutes.

B

in perfi

DE LITERARVM LVDIS

in perficiendo, & in conseruando memoria. Vbi enim hæc sunt, ibi etiam mentis est integritas, de qua est apud Platonem, quæ ueritatem amat, & odit, quod est contrarium. Optabile est omnia hæc simul, & æqualia esse in omnibus, uerum id in hominum naturis positum non est. quæ uariæ sunt & multiplices. Itaq; etiam illa ingenia à ludo & puericiæ disciplina reiicienda non sunt, in quibus hæc inueniuntur mediocria. Neq; confestim iudicium fieri & celeriter potest. Quidam enim ingenio atq; natura acuti, principio tardi sunt ad intelligendum, tempore tamē atq; exercitatione postea celeres motus ad percipiendum consequuntur. In multis naturæ consopitæ, atq; oppressæ corporis grauitate iacent, quæ præceptis informatæ & eruditæ, eximiæ atq; illustres solent existere. In nonnullis etiam excellens ingenij ad percipiendum ratio est: at memoria interim tarda, interim etiam non firma, quæ disciplina & usu excitari & confirmari potest. Volūtatis primo habenda ratio est, quæ cum adest, spes sit etiam de mentis sensibus. si desit, primum laudatione & promissis est prouocanda, latent enim multa quæ non apparent. Deinde si hac non succedat, obuiurgatione utendum est, neq; abstinendum à uerbis antequam desperetur. Est etiam aliud ingeniorum genus, de quo est apud Platonem in libris

de Repu.

Voluntas.

de Repub. quod industriam claudicantē, ut ipse uocat, habet, uenationibus & palestræ magis quàm literis atq; doctrinis deditum. Hoc Socrates à Dialectica disciplina repellit, nos etiam ne ad literas quidem idoneum putaremus, si omnes perfectos esse uelimus: at ferendi sunt etiam mediocres, & corrigi possunt deteriores animi impetus disciplina & consuetudine.

De cultu & oratione puerorum.

Hæc tum demum recte instituitur, cum uniuscuiusq; natura considerata est, & cum ad uitæ genus omnes actiones, omniaq; studia conferuntur. Quapropter ut uiuendi ratione, ita etiam cultu & oratione, atq; moribus studiosi ab indoctis differant. Quibus in rebus maxime quid deceat uidendum est. Decet autem id maxime, quod à professione uitæ nō est alienum. Iam cum professio studiosorum sit ratione & oratione uti prudentius quàm faciunt ceteri homines, uacare debet omnis actio atq; sermo, temeritate & negligentia: & ordo & constantia, & moderatio dictis omnibus factisq; est adhibenda. Occultandus etiam si frenari omnino non potest, uoluptatis & libidinis appetitus. Quare si amor est uitandus & dissimulandus adolescenti, de-

Professio
studiosorum.

DE LITERARVM LVDIS

Cultus
corporis.

Sermo op-
timus.

cet etiam ab eodem formæ studium esse remotum. Et si dedita militiæ & uenationum studijs ingenia, corrigenda sunt, debent etiam, qui corporis cultu militem magis & uenatorem, quàm literis deditum puerum referunt, aut emendari aut commoneri. Vestes dissolutæ, constringi, pendentes ex humeris, applicari, scissæ consui possunt, quare locus in his excusationi non est, sed est relictus repræhensionis. In sermone semper quod illiberale & pëtulans, & flagiciosum & obscœnum est, in pueris animaduertendum, tollendûmq; est. Sed habent quædam naturæ uicia quæ uerbis magis quàm uerberibus tolluntur & emendantur, ut est in sermone, aut tarditas barbara, aut præcipitata celeritas. Verba etiam & sententiæ emendandæ, quibus, is qui audit contemni uideatur, sed tamen propter consuetudinem aut ignorantiam, non emendandæ uel acerbe uel cum dolore. Optimus sermo est qui habet prudentiam, ordinem, uerecundiam. Vituperandum est, quod est stultum, emendandum quod indoctum & turbatum: quod uero inuerecundum, si impudens sit, ut est ostentatio, uerbis, si impudicum, & flagiciosum, ut obscœnitas & mendacium, acrius animaduertendum est. Deniq; cultus ad ualitudinem, & professionis conuenientiam, sermo ad prudentiam & uerecundiam referatur. Qui hæc non retinent, uiciosi sunt, &

sunt, & obedientiam, quæ in disciplina est præstan-
da, abiecerunt. Est etiam aduersus omnes homines
adhibenda reuerentia. Itaq; ultiosum est magistra-
tui, theologo, magistro, parenti, seni, nõ assurgere, Reueren-
non caput detegere, non respondere, aut non ita re-
spondere ut decet. Obedientiam relinquunt, qui lu-
dunt cum uacatio studiorum non est data, contra re-
uerentiam faciunt, qui tum ludunt, cum id cæteri ci-
ues uident, quibus nota est disciplinæ consuetudo.
Qui in somno et quiete, qui in ludo modum, tum eti-
am cum conceditur, non seruant, tametsi grauiissi-
mum facinus nõ sit, tamen quia intemperantes sunt,
deformant disciplinam. Laudata uero illa discipu-
lorum congregatio est, in qua & præstans natura,
& amor ardens, & diligentia constans, & uerecun-
dia est liberalis.

De pauperibus:

PAuperum uero magnas ciuitates in primis ra-
tionem habere decet: Semper enim honestissi-
mum fuit liberalitatem & beneficentiam colere, &
Christus pro se pauperes suo gregi reliquit. Sed non
unum genus egestatis est. Sunt quibus inuisus labor
est, & gratior est inertia, quod genus mendicorum
cum corporis uiribus non destituatur, eiiciendum est
e ciuitate recte instituta. Est enim uel inutile & cæ-

DE L I T E R A R V M L V D I S

teris obstat, uel sceleratum & latrocinij furtisq; de-
ditum. Quibus uero, etiam si uiribus ualeant, & in-
genio aliquid possint, tamen aut liberorum multitu-
do, aut parentum creditores, aut casus amicorum,
aut priuatæ aduersæq; fortunæ impedimento sunt,
hi si uirtutem amant, & dedecus effugere cupiunt,
ab omnibus bonis ex ærunnis sunt eripiendi. Et si e-
nim miserum est, tamen quia non est consceleratū,
debet subleuari. Nam si Rerump. finis fœlicitas est,
haberi potest in miseris ea ciuitas, in qua ciues bo-
ni premuntur egestate. Est huic generi etiam terti-
um adiungendum, quod uel diuturnitas morbi, uel
uirium imbecillitas, uel senectus, facit ærumnosum.
Sed hæc tria genera, non ad nostram institutionem.
uerum est præterea aliud, quod uiribus integris est,
& ingenio plurimum potest, nullaq; fortuna iniqui-
ore est afflictum, quàm quod ex parentibus egenis
est natum, & ad literas excellentem naturam habet,
ad quarum studia sua sponte fertur. Huius mēdicitas
non solum excusari, uerum etiam laudari debet, &
mouere cæteros ad bonitatem. Est etiam nostro se-
culo pernecessarium. Nam contraria diuitiarum &
paupertatis, uirtutis & uicij, liberalitalis & auidi-
tatis sunt studia. Vbi enim ampla literis præmia ex-
posita sunt, ibi maior existit studioforum copia, quā
apud illas gentes, quibus gratior barbaries est, quā
elegantia

Recip. si-
nis.

elegantia doctrinarū. Diuitum uero atq; nobiliū, nisi singulari naturæ bonitate præditi sint aliqui, multo maxima pars aut effœminata luxu, aut uicijs illis cæteris dedita, quæ propria illorum sunt, peruersè iudicat, & ad ambitionem, atq; pecuniæ studium rapitur, in quibus difficile semper fuit moderationem retinere: apud hos uero uirtus esse putatur, uaserrimum opum, honorumq; sine modestia, & religione, sectorem fieri. Longius progrediuntur, & magnos gradus ac processus faciunt, quibus religio & uirtutis dignitas proposita est, quam hi, qui quæstum atq; potentiā sequuntur, & per gratiam & opes nulla doctrina, nulla sanctimonia uitæ ad amplissimos honores ascendunt subito. Paupertas uero tarde & sero peruenit quo uult, sed tamē multos edit, quæ res magnas & arduas elaborat atq; perficiunt. Electio aut in multitudine ac uarietate, quàm in paucitate et solitudine facilius est. et ex his quæ diuitijs effluunt, & genus clarum à maioribus comparatum habent, pauci sunt qui ad se literas pertinere putent: paupertas uero tametsi in omni re optimam quicquid rarissimam sit, tamē plures ad literarum studia & amorē excitat. Magnam uim ipsa habet ad suscipiendum, sed impedimento est egestas ad perficiendum, si non sustentetur. Itaque non excludi à ciuitatibus mendicitatem decet, quæ amore sapientiæ flagrat: neque solum ciuium liberis

Diuitiæ insolentiam pariunt.

Paupertas amas uirtutem subleuanda.

DE LITERARVM LVDIS.

tribuendū id est, ut alantur gratis uirtutis ergo, sed etiam peregrinis atq; alienis, in quibus ingenij ac industriæ lumen accensum uidetur. Maxima enim semper summaq; hospitalitatis et bonitatis laus fuit, & inter nos qui Christiani nominis sumus maximopere necessaria. Hoc enim religio ab elegantia & questus cupiditate differt, quod hæc duo cum illustribus & florentibus hospicium faciunt, illa uero, his à quibus neq; gratiam, neq; opem, neq; questum expectat domum apertam habet. Sed in pauperibus ordo moderatioq; tenenda est, ut ne ciuium liberi, præsertim si boni sunt, egeant & ut meliorum ratio habeatur, semperq; præferatur id quod est optimum, Ciuium liberos in egestate esse, turpe est, & honestum est alienos non defici. De quorum indole constat, certus numerus constituatur, quibus Resp. uictum suppeditet, cæteri priuatim à ciuibus conquirant necessaria. Omnes autem & qui priuatim ciuium benignitatem expèriuntur, & qui ex communibus facultatibus aliquid capiunt, ornamentum non dedecus, & utilitatem, non molestiam scholæ & disciplinæ adferre debent: excludendi sunt, si faciant secus quàm deceat. Liberam enim bonitatem ciuium non obstrictam esse uolumus. Ornamento est, qui uirtutē & religionem colit, inutilis est, qui non potest esse exemplum, sed exemplo obest.

Ciues
pauperes,

De priui

De priuilegijs.

Priuilegia enim non ad impunitatem, & errorum defensionem feruntur, sed ad puniendum fontes irrogantur, & tuendum insontes, & confirmandum res communes sunt comparata. illa uero iura, quibus utitur Lutecia & Louanium, & cæteræ ciuitates, in quibus docentur artes atq; doctrinæ, ob raritatem studiosorum uidentur esse constituta. Fuerunt enim tempora, quibus profligatæ literæ, omnesq; doctrinæ fuerunt: ad quam calamitatem tollendam excitata fuerunt magistratuum studia, & proposita præmia, et aditus ascensusq; patefactus ad honores, & in petulantes ciues, quibus ingrata & contempta literatorum ac studiosorum conditio erat, irrogata priuilegia. Itaq; ad excitanda ingenia, præmia honoresq; expositi & ad defendendum ocium retinendamq; dignitatem, tales leges sunt latæ. Sed factum est in hac re, quod cæteris omnibus rebus fit quæ sunt bonæ, ut paulatim illis homines abutantur. Nam et in tribuendis honoribus, temporum magis & pecuniæ ratio habetur, quàm uirtutis atq; doctrinæ. neq; delectus ullus habetur, ordinesq; peruertuntur, atq; ita iure nostro utimur, ut ad impunitatem facinorum, & integumentum uiciorum, & uanam, falsamq; sapientiæ persuasionem constitutum

Quare
priuilegia
data.

B 5 esse uide

DE L I T E R A R V M L V D I S

esse uideatur. Verum Magistratus ut dare, & præmijs afficere, sic etiam corrigere & auferre potest. Apud Græcos qui præclare de Rep. meriti erant, illis quotidianum in Prytaneo sumptū ciuitas præbebat. at si quis postea patriam prodere conatus esset, & abuti scelerato aliquo facinore cœpisset hac benignitate, eundem non solum honore priuassent, sed lege etiam egissent, & de capite causam coegissent dicere. Ita honorem in Rep. retinebant, uicia corripiebant. Legibus frui debent, in quibus ea sunt, quorum causa sunt latæ, rerum cognitio, & amor literarum. qui uero uiolant leges, & dehonestant consuetudinem, reprehendendus omnis ordo, Magistratusq; est, si nō puniantur. Quappter perenniamq; dem contestataq; priuilegia esse uolumus, sed ita, ut seueritas disciplinæ, mosq; uetus retineatur.

Hæc sunt quæ breuiter & generatim, de uniuersis quæ ad literarum ludos pertinere uidentur, scribenda commonendaq; uidebantur. Satis enim præclare agetur, si omnium studia refrantur ad pietatem & sapientiam. Si copia eorum qui docentur tanta sit, ut præclarorum ingeniorum delectus haberi possit: si Magistratus præmia constituat, & addat dignitatem, si coniuncta sint parentum ac magistrorum studia, & uoluntates. Si magistri tales sint, & doctrinā tantam habeant ut possint, & ea uirtute prædi-

Qui priuilegia
legis uti
debeant.

Scopus
studiorū.

te præditi sint, ut uelint & cupiant illustrare atq; amplificare literas, si pauperum ratio habeatur, si legibus atq; priuilegijs, ita ut lata sunt, utamur. Deniq; tum demum omnia florebunt, cum id tantum quisq; agit, quod sibi ratio & uitæ genus præscribit. Id neq; à Deo maius nobis imponitur, quàm ferre possimus, neq; quisquam suscipit prudens, quod efficere non potest, & in liberis ciuitatibus tantum unicuiq; mandatur, quantum uires atq; ingenium possunt sustinere.

Vnum in ciuitate commune publicumq; gymnasium esse constituendum.

Scribendum deinceps de constituendis scholis, et distribuendi sunt ordines, & docendi ratio, atq; disciplina tradenda est. Quod enim temere fit, et per turbate, & dissolute, raro magnos facere progressus solet. Itaq; recte apud Platonem Protagoras sentit, etsi orator nō sapiens inducitur: tamē illud uere τὰς γὰρ ὁ βίῃ το αὐδρώπῃς ἀρετὰς τὰ καὶ ἀγαθώτατα δεινὰ.

Vno igitur in loco, quemadmodum unus etiam uerorum studiorum finis est, ludos literarum comprehendere utilius est, quàm per diuersa ciuitatis loca esse distractos. Ut enim ineptū esset, decē ouibus magistros singulos, singulaq; pascua singulis assignare.

DE LITERARVM LVDIS

gnare, sic etiam non laudabile est, quod ab uno, aut à paucis peræq; ut à multis fieri potest, eodemq; in loco, distrahere id & pluribus committere. Deinde gaudet homo societate & frequentia, & pauci sunt quibus grata sit solitudo. Raro etiam absq; uarietate & præstantia est multitudo, itaq; & delectum & exempla habet. Xenophon quoq; Persarum ἐλευθεῖραν ἀγορὰν uno in loco fuisse coedificatam scribit, semotam à turba atq; strepitu. Omnis enim liberalis educatio ὁκοσμίαν & συνήτησιν καὶ συμπεριτὴν ἀρετῶν habere debet, ut ordine atq; modo omnia progrediantur, ut communia studia, coniunctæq; uires, quasi uno aspectu appareant. Quæ causa etiam Persas mouit, si uere Xenophon scribit, ut tametsi distriubta loca illa essent, quæ appellabantur χῶραι, tamen in iisdem locis uersabantur pueri, adolescentes, natu grandes, & qui emeritum militiæ tempus habebant. In coetu enim & frequentia, plura atq; præclariora ad excitandum exempla & maiores ad discendum occasiones exhibentur, quàm in paucitate: quare ciuitates ad docendum aptiores sunt, quàm loca deserta, ut uult Socrates apud Platonem in Phædro. Itaq; nisi multitudo hominū conuenientium, & ciuitatis amplitudo tanta sit, ut locus unus non sit satis, id quod fit Luteciæ, utilius est coacta esse, quàm distracta gymnasia. Etenim &

qui do-

qui docent, & qui audiunt, uarietate & copia excitantur; languescunt autem solitudine atq; raritate. Vnum igitur literarum liberalium sit gymnasium, in commodo medioq; ciuitatis loco coedificatum, si id ferant, & locorum interualla, & multitudo: sed hoc quoq; suis sit distinctum ordinibus, qui diuisi erunt & docendi genere atq; uarietate & laborandi exercendiq; temporibus, de quibus nunc est præcipiendum.

Frequen-
tia studi-
um exci-
tat.

Ordinum distributio.

PROPOSITUM à nobis est, sapientem atq; eloquētem pietatem, finem esse studiorum. Omnes enim homines pietatem colere decet: at hoc literatus ab indocto differt, quod ratione atq; oratione præstet. Quare proposita esse debet rerum cognitio, & orationis puritas & ornatus, qui hoc nomine, quo homo homini antecellit, uolet haberi dignus. Huc igitur referant uniuersa studia, qui proficere, & qui accipere talem disciplinam uolunt. Et quanquam coniuncta sunt, sapientiæ & linguæ studia, tamen humanæ naturæ aptius est, si ab orationis elementis, inchoetur institutio: ueruntamen morum quemadmodum dictum est, semper, atq; continuo disciplina retineatur. Cum ergo primus labor

Finis stu-
diorum.

Eloquen-
tia ante sa-
pientiam
tradenda.

ad infor-

DE LITERARVM LVDIS.

**Perfecta
oratio pu-
ra sit, or-
nata, & re-
bus con-
gruens.**

ad informandam erudiendamq; linguam suscipien-
dus sit, recte fiet, si ad orationis diuisionem, etiam
ordinum distributionem accomodemus. Volunt
enim optimi autores, ut oratio perfecta, primum
pura sit, & dilucida: deinde ornata: post etiam ad
id de quo dicitur congruens & apta. Duo illa pri-
ma propè eandem & certe copulatam doctrinam
habent, & tum nostris temporibus cognoscuntur,
cum adhuc magistris & pædagogis est puer subiec-
tus. Tertium ut est insignius, ita etiam liberaliorem
exercitationem requirit, sed tamen non solutam le-
gibus, ut in metu adhuc sit adolescentulus. Quartū
confirmatum in literarum studio animū desiderat,
itaq; eiusmodi leges postulat, ut obseruantiam præ-
stent auditores, & qui docent retineant autoritatē,
& in obtemperando obsequium uoluntatum, & in
præcipiendo seueritas sit liberalis. Diuidemus igitur
omnes ordines in duo genera. Vnum est pueri-
ciæ, quod necessarias, perpetuasq; auscultationes
habet, alterum adultæ ætatis, quod publicas, atq; li-
beras requirit. Puerili educationi annos nouem da-
mus, publicæ auscultationes utiq; quinque sibi assu-
munt. Itaq; fiet ut etiam si septimo anno puer ad
magistros ducatur. tamen uigesimo primo per om-
nes ordines sit progressus.

**Auscul-
tationes ne-
cessariæ.**

Libera:

Quo tempore puer ducendus sit ad
magistros.

Sed

Ed non idem in omnibus ingenij lumen est. Excellentes quædam naturæ sunt, quæ quinto anno literarum uim, & legendi rationem, cōsequi possunt, quædam etiam uix septimo excitantur, quamquam qui id tempus excedant, si stupor maneat, raro ad frugem perueniunt. Sed ut illæ quæ celeriter & cito incipiunt, aliquando præproperæ solent esse, & ætate deprauari, sic illi qui uix septimo anno excitantur, sæpe firmitus iudicium, & constantiorem uoluntatem consequuntur. Medium igitur tempus sextum annum idoneum ad discendum omnibus statuimus, ut simulac puer annum quintum egressus est, & ad sextum ætate peruenit disciplinæ tradatur. Qui uero ante eam ætatem assequi grandiores possunt, magna de se signa dāt talis naturæ, quali Dialecticos præditos esse uult Socrates & οὐ τῶν τῶν τῶν. nominat, quibus scilicet celeres motus sunt ad intelligendum.

Sexto anno magistro tradendus puer.

Quot ordines necessariarum
auscultationum.

Cum primum igitur infantie anni præterire, & aduentare puericia incipiet, committendus puer est literarum doctoribus, & ducendus paulatim per omnes huius disciplinæ ordines. Horum numerum, annis illis definimus, quos dedimus puerili educationi. Sint igitur nouem ordines, siue curæ, siue

DE LITERARVM LVDIS

**Nouem
classes.**

riæ, siue classes, aut etiam tribus, aut quocunq; modo appellare libet, quemadmodum anni sunt etiam nouem. Ex his orationi latinæ atq; dilucidæ, septem constituimus: reliqui duo ad comparandum ornatum, idonei sunt, cuius prima præcepta in his duabus curijs traduntur, exercitatio autem iustior atq; maior facultas, illis quinq; annis, quos liberis scholis atq; apte dicendi generi necessarios putamus, accedet. Vt enim pura & perspicua oratio, coniuncta doctrinam habet, & sunt ἀντίρροπα, sic etiam ornatu esse uix ullus potest, si sit ineptus, & aptum nihil dicitur quod est inconditum. Fui aliquando in ea sententia, ut sex ordines sufficere putarem, sed usus, hæc partitionem utiliore docuit: Septem igitur annos matri ad educandum & ludendum cum puero damus, quatuordecim debentur magistris, neq; poeniteat ante uigesimum primum non exire e scholis puerum. Ante enim id tempus, & matrimonia & publicæ curationes inutiles sunt, sed hoc curriculum, literarum palestræ & ludo aptissimum est.

Ordinum utilitates & singulorum ordinum distinctio & quomodo excitandi pueri.

Est autem in hac distributione tum necessaria quædam utilitas, tum eiusmodi oblectatio quæ pue

quæ puericiæ studijs est accommodata. Nam fieri non potest, ut unus omnia docere possit: & nisi certus contestatusq; ascensus inueniatur, accidit plerunq; ut à uero itinere non solum ignoratione, uerum etiam cupiditate aberremus. Nostris etiam temporibus quotus quisq; est qui uigesimo primo anno aliquod præclarum doctrinæ documentum statuerit. Vix quinquagesimo assequimur, in quo statim iuuenes decebat excellere. M. Cicero annos natus uiginti sex, nec amplius, orationem pro P. Quintio & Sexto Roscio habuit. quis postremis hisce seculis è uita excessit, uel senex qui tale post se exemplum reliquit? At neq; libri nobis desunt, neq; ingenio carent homines nostri, labore fortassis etiam non cedunt, duo tantum desunt, Romanus sermo, & recta ratio, uetusq; disciplina, quorum utrunq; comparandum est, antequam perfectum aliquid expectemus. Sunt aliæ multæ utilitates quas hic commemorare non est opus: delectatio uero in eo est, quod quasi imaginè exprimat ciuitatis & integræ Reip. Tres enim illi uiri omnium præfecti, quos Senatus constituit, quasi Aristocratiae faciem repræsentant, Imago & alteri tres qui intermedij sunt, inter hos tres reip. quos dixi, & inter moderatorem disciplinæ tanq; administri sunt, si quid extra ordinem sit deliberandum. Tota deinde multitudo ut omnes ciues sic in-

Utilitas
huius or-
dinis.

Delecta-
tio.

DE LITERARVM LVDIS

ordines, quasi in tribus atq; classes digesta est, quibus singuli doctores tanquam plebi curatores, aut etiam tyronibus magistri sunt præfecti. Ordines uero per decurias distinguuntur, ex quibus decuriones deliguntur: animaduersores morum, & exactores officiorum. Ipse etiam moderator, ita præest, ut innoxius Dictator, qui Magistratui potentiori subiectus, tum demum laudem obtinet, si recte regat, & magnos utilitatis fructus præbeat. Præmia etiã singulis ordinibus, ceu fortibus ciuibus proponuntur, cum progressio quotannis fit ad loca superiora de qua est etiam explicandum.

De progressionibus ordinum.

Multum excitat adolescentes, cum quantum profecerint animaduertunt. Plerunq; etiam posteriora faciliora putant, cū priora superarunt. Vnde illa Aeneæ cohortatio.

O passi grauiora dabit Deus his quoq; finem. Solennis debet igitur quotannis ascensus ad superiores ordines fieri. ad quem non solum magistri uenient, uerum etiam omnes præfecti, cum Theologis, atq; puerorum parentibus ac amicis. Duobus etiam in singulis ordinibus, qui maiores quàm ceteri profectus fecerunt, præmia danda sunt industriæ atq; uirtutis. Et quoniam ea in re gratia suspecta sepe est, ius

est, ius erit inferioribus congredi cum his qui præpositi sunt, & stilo & oratione & disputatione contendere, ut si par sit, qui concertat eodem præmio afficiatur: si imbecillior, redeat tamen ad suum locum cum nullo dedecore. Calendæ octobris utiles sunt ad eam progressionem, aut enim desinunt tum morbi, aut nulli sunt, aut si sunt, vitari possunt. Medium etiam tempus est, ut neq; nouo labori hiemis inclementia obstet, neq; finis æstatis fastidio afficiat adolescentes, qui se tum ad Calendas Octobris præparabunt.

Progres-
sionum
tempus.

Postremus ordo hoc est nonus:

Est autem à postrema parte sumendum principium. Itaq; sub quintum sextumue annum ad eum ducatur, qui literarum figuras, coniunctiones, sonusq; docet, cui cognitioni nonam tribum, primumq; & unum annum damus. Sed cum duo proposita sint, ad quæ illa tria referantur, lectio atq; scriptura, quod omnibus præcipiendum est, hic primus tenere debet, ut quod optimum est sequatur. Doceat igitur literarum figuras, quoad potest elegantissime ducere atq; representare, & earum sonum plene, & ut decet exprimere. Tradat ergo linguæ, & spiritus, et vocis moderationem, in quo uidendum est

Lectio, et
scriptura.

C a ne quid

DE LITERARVM LVDIS

ne quid quod putidum, obscurũ, exanimatum, inflatumq; grauius sit, exprimatur. Vox lenis, non aspera, spiritus plenus non anhelatus, sonus pressus & æquabilis, nõ uastus aut hiulcus aut rusticus esse debet. Qua in re uulgi consuetudinem improbare, cũ fit recte licet: sed quod doctissimi faciunt, id semper est retinendum. Qui optime pronunciant, multa cũ Græcis & Italis communia habent, sed quædam habent singularia. In Germanis multa sunt corrigenda, plura in Anglis & Gallis. Itali peccant minus. sed nemo in literis nonnullis non uiciosus, aut singulis aut connexis. In docendo etiam morũ curam hic agere decet. Itaq; in catechismo exerceatur. Is breuis sit, ut statim transitus fiat ad nominum & uerborum inflexiones, quarum certa exempla, eaq; generalissima sunt deligenda. Si recte institutio accommodabitur, in quo non praua natura est, uno anno & legere discet, & inflectendi formas communes mandabit memoriæ. Quibus uero aliquid superest temporis, his faciliores & breuiores Ciceronis epistolæ sunt proponendæ, quales illæ sunt, quas ad Terentiam uxorem & quædam, quas ad Tironem Libertum scripsit. Nos tres libros ex omnibus epistolarum uoluminibus elegimus, in quibus non quid doctissimum sit spectauimus, sed quæ maxime idonea huic ætati essent, congesimus: neq; scio an quicquam

Catechismus.

quam

quam sit, quod utilius à principio proponi possit.

Ordo octauus.

AD octauū ordinem, illis de quibus dictum est, iactis fundamentis, prima studiorum progressio, primaq; industriæ exercitatio fiet. Nam qui præmia acceperunt, conabuntur ut sequenti anno, partum honorem non perdant: & ad nouā laudem uiuamunient. & qui postremi fuerunt ut ne rursus uincantur, elaborabunt, & nitentur pares esse doctioribus, aut etiam antecellere. Diligentior tum primis sex mensibus tradenda est grammatices partitio, uerum neq; obscura, neq; ad omnes exceptiones deducta. Duabus quotidie horis opus est ad hanc explicationem: id quod reliquum temporis est, æglogis Vergilij & Epistolis Ciceronis est tribuendum. Est autem id duarum horarum: quasi enim quatuor horis doceatur, ita præcipio. Dissolui Epistolæ debent, & flectenda atq; uarianda uerba singula, eaq; rursus coniungenda, & uniuscuiusq; consecutionis tradenda ratio. Sed rationem construendæ orationis in posteriores sex menses differo, cui doctrinæ horæ duæ quotidie sunt transmittendæ, alteras duas ut superioribus sex mensibus in Epistolis Ciceronis, & Vergilij æglogis alternatim ponere oportet. Cōsuescere hic puer Latino sermone incipit, & propo

Partitio
Gramm.
ticæ.

DE LITERARVM LVDIS.

sitas sermone quotidiano sententias, formis latinis
cōmutare. Hæc enim exercitatio recte stylum præ=
currit. Carmina etiam modulari tum debet magi=
ster: idemq; puer consuetudine atq; exercitatione
magis quàm ratione imitari. Quodcunq; autem tra=
ditur, nisi id apertissime explicetur, uiciosum est.

Ordo septimus:

VBi ad septimā tribum ascendit, colligere post
uires ingenij illa ætas incipiet, & de se aliquid
promittere. Cognita enim hic tum sunt magna ex
parte, nominum uerborumq; & genera & inflexio=
nes: præcepta etiam non ignorantur orationis cō=
iunctæ. Sed repetenda hæc subinde sunt, & renouan=
da memoria: quapropter recte distribuenda tempo=
ra sunt: ut ne horum reuocatio, insequentium rerū
cognitionem impediat. Verborum enim atq; syllaba=
rum omnium tempora atq; moræ sunt perdiscen=
dæ, neq; ignorandi orationum modi, & uersuum ge=
nera. Sed satis est horam unam huic præceptioni
quotidie dare. Nam neq; multis tradenda est, & si
quid deerit, quod cauere ne sit nimium oportet, si
quid tamen deerit, in sextis consumabitur. Propo=
nendi hic sunt duo illi libri Ciceronis & elegantes
& pij, et ad intelligendum faciles, unus de Amicitia,
alter de Senectute. Atq; his alteram horam uacuant
cetero

Cicero de
Amicitia
& Sene=
ctute.

Poetæ.

Stilus.

Verba
Poetica.

cætero labore uolumus. Tertiam poetæ sibi uindictant. Aeneis Vergiliana uirtutes omnes heroici uersus habet, reliqua genera ex Catullo, & Tibullo, & Horatio sunt congerenda. Plura ex Catullo & Tibullo si essent pudica, sed si id nō licet, & si quæ desunt, meliora enim uix apud cæteros inuenias, tamē quæ desunt, ex Horatio colligantur. Sed nihil in pueri aures atq; animum intret, quod non sit pudicum, pium, elegans, liberale. Stilo quartum dicendi tempus concedatur, propterea quod in proponendis argumentis & corrigendis scriptis utilitas magna posita est, & plurimum temporis consumitur. Si quid autem supererit, id ei rei quæ magis egebit explicatione licebit surripere. Sed eruenda sunt argumenta, ex illis quæ audiuerunt pueri, ut cognoscant, unde sint capienda uocabula, et sententiarum formæ. Distinguenda quoq; diligentissime poetica uerba & figure, ab oratorum puritate. cogitetq; nihil quod non legerit in Cicerone, aut non permiserit magister, esse oratorum. In carminibus faciendis subleuanda pueri industria est. Est enim per se molestæ, idq; principio scribendi cōsuetudo: Poetæ r. uero oratio, cō plus habet difficultatis, quo cōiunctior est atq; astrictior uerborū cōtinuatio. Quocirca transponenda bonorū carminū uerba sunt primis mensibus ut solū in structura laborēt. post sententiæ

DE LITERARVM LVDIS

liberæ proponendæ, sed tamen omnes ut harum inuestigatione non habeat opus, sed in uerborum inuentione & connexione sit occupatus.

De memoriæ exercitatione:

TRes isti ordines magnam requirunt memoriæ exercitationem. Nam eiusmodi præcepta sunt quæ traduntur, ut omnia illa teneri memoria eaq; perpetua debeant. Itaq; non plus legendum est, quàm recordandi uis possit sustinere. Quarundam tamen rerum intellectarum, loca utilius notantur, ut exceptionum, quàm res ipsæ statim animo insculpantur. Sed sunt quædam quæ statim teneri perneccessariū est, ut κατὰ λέξ artis & inflexionū formæ atq; exempla. In Cicerone & Vergilio haud scio utilius ne sit omnia quæ leguntur, an ea solum quæ insignem habent imitationem, posse memoriter cōmemorare. Inconsulta enim adhuc illa tum ætas est, & multa mandanda, quæ sua sponte non faciet: neq; satis illud discitur, quod cum opus est nos fugit. Itaq; quotidie aliquid proponendum non solum ad intelligentiam, sed etiam ad memoriam exercendam. Verum ut dixi, quantum uires, rerūq; natura ferre potest, tantum est imponendum. Repetenda etiā modico interuallo ad cogitationem renouandam, quæ semel didicerunt, sepe numero & statis temporibus. Sed illustriores fiunt animi sensus, ipsaq; re-

miniscen

Quæ edi-
cenda.

miniscendi facultas magis illuminatur, & singulorum facilior est, & inuentio & usus: si patientur, & communibus quibusdam iudicijs, quasi membra-
tim incisimq; ad generalia capita congerantur. ut quæ mens ipsa composita memoriter recitare potest, sciat etiam quibus in locis eadem dissoluta atq; distincta inueniet. Quemadmodum enim ualde nos illæ tabulæ Cosmographorum excitant, atq; illustrant sensus, quæ eadem loca descripta habent, in quibus aliquando uersati sumus: ita etiam uastæ sunt illa composita, quæ animo compræhendimus, propterea quod una in re omnia stilius non complectitur sed cum unum in locum annotando cumulantur, explicant sese, & clarius intuenda proponunt.

De ratione docendi, & de horis.

Sed alio loco tradenda est hæc ratio resoluendi, nunc uero antequam ad sextum ordinem ueniamus, breuiter de modo explicandi, & de horis quibus docendum est, quædam interponamus. Neque enim onerandi sunt longis lectionibus pueri, neque satis est magistrum præstantissima delegere, eademq; intelligere, sed in explanando expeditissimam, utilissimamq; uiam cognoscere, atq; inire oportet. Quæ in re uituperandus illorum mos est, qui continetibus multisq; horis aures occupant auditorum

Non diu docendū,
nec oīa eodem loco,
& tēpore.

C s neq;

DE L I T E R A R V M L V D I S

neq; satis esse putant, id solum explicare quod est in scriptore, neq; sufficere posse putant inchoatam sepe alicuius rei cognitionem, sed omnia conantur uno in loco docere, et plerunq; aliena adferunt quo quàm diligentissimi, & quàm doctissimi esse uideantur. Equidem fateor semper aliquid uel audiendum, uel legendum, uel scribendum, uel cogitandum atq; quærendum esse, sed fastidium parit continuata & proluxa attentio: uarietas uero satietatem & offensionem aufert, & habet uoluptatem. Relaxata scholarum contentio, domestica studia, & secretas cogitationes excitat. Quatuor aut ad summum quinq;, sed non pauciores quàm quatuor, neq; plures, quam quinq; horæ sunt imponendæ magistris. Hæ pro locorum & temporum & consuetudinũ ratione sunt distribuendæ. Facilitas in explicando semper tenenda est, ut quæcunq; audiant iuuenes, queant etiam intelligere. In postremis istis ordinibus uerba tantũ & uerborum cõiunctiones tradendæ. & sententiarum formæ interpretandæ ita sunt, ut & sensa illarum consequantur, & cognoscant quibus in locis similibus uti liceat. Primi autem consuetudinum, historiarum, consiliorum, ornamentorum, & insignium locorum, qui in arte continentur, explicatione requirunt. Verum distribuenda suis temporibus omnia sunt: neq; artificiosi doctoris est quicquam alieno

Varietas
tediũ ex-
pellit.

alieno tempore exponere, aut commemorare. De-
 liberare igitur semper, cum re, & cum uiribus in-
 geniorum, oportet. Ex quouis enim ligno Mercu-
 rium uelle facere, ineptum est. Herere etiam atq;
 sedere uno in loco diu, obstat & officit celeritati at-
 q; festinationi mentis. Sed & præpropera festinatio
 sensus fatigat, & conturbat memoriam. Medium
 tenet, qui mature agit, neq; plus proponit, quàm
 ingenia ferre, neq; diutius immoratur, quàm res
 quæ ad cognoscendum exponitur, requirere uidea-
 tur. Varietas etiam eodem die uitanda est, illa incon-
 siderata quæ fit aut singulis, aut ijsdem horis. Quæ
 dierum interualla habet, utilior esse solet, sed nunq̃
 ad noua ueniendum est, anteq̃ susceptum argumen-
 tum perficiatur. Inchoatam enim aut argumentati-
 onem aut narrationem, aut artis caput, intermitte-
 re, & aliquid interponere, intelligentiam distrahit,
 memoriam confundit, & mentē quæ semper ad per-
 fectionem peruenire conatur, grauat. Plura eodem
 die quàm tria exerceri, uituperandū est. Vtilius est
 in duobus cōsistere, sed aliquñ necessariū est tertium
 adhibere. Quantū uero pueri intelligāt, & quantū
 cōsecuti sint, facile cognoscūt tum doctores, cū quæ
 audierunt, quasi repetunt interrogationibus, quæ
 breues sint & apertæ. Cauēda enim omnino sunt, in
 scholis illæ orationum longæ & concitata circum-
 ductiones,

Deliberā
 dum quid
 res requi-
 rat, &
 quantum
 ingenia
 ferre que-
 ant.

Semel sur-
 scepta per-
 ficienda.

Duo aut
 ad sum-
 mum
 tria eodē
 die exer-
 cenda.

DE L I T E R A R V M L V D I S.

ductiones, quas etiam si animi celeritas assequatur, tamen memoriæ fidelitati semper est inimica, mētis etiam uegetationi quæ spaciū sæpenumero ad meditandum requirit, est ingrata.

Ordo sextus.

Non mihi dubium est quin consequatur puer quod pollicemur tribus hisce annis : ut latinæ atq; dilucidæ orationis præcepta teneat, ipse etiam uim aliquam faciendi similia comparet, si ingenii studiumq; non desit, & si recte, atq; hac ratione instituat. Post nonum igitur decimumue annum ingredi puer in eum locum debet, in quo educantur, quibus præcepta, reducenda potius in memoriam sunt quam tradenda noua. Itaq; nisi quid addendum sit, quod antea doceri non poterat, uacatio præceptorum danda est eo anno, & solum cognitarum rerum memoriæ consulendum. Id commodè in oratorum & poëtarum explicatione fieri poterit. Pergere hic in Aeneide adhuc debent, hora una, & absoluenda sunt ea, quæ ex Catulli & Horatii collectis carminibus restabunt. Deligendi etiam ex Cicerone speciosi & illustres quidā loci, ut sunt magnarum rerum infinitæ quæstiones, ut commemoratio- nes quæ aliquā laudem, aut uituperationem, aut singularem quendam uel ordinem uel munitionem habent. Sunt etiam argumentationum pulcherrimarum exempla

Res cogni-
tæ per ex-
empla re-
petendæ.

exempla non ulla, quæ recte ad imitandum propo-
nuntur. Quidam sunt quoq; in Cicerone sententia-
rum circuitus, qui ornatum summum, qui figurarū
non unum genus habent, & utiliter mandantur me-
morix. Ipsæ præterea figuræ uarie & singulari sæ-
pe ratione commiscuntur, quæ nisi notentur, occur-
rere in scribendo non solent. Illa omnia huic curiæ
tribus libris congeri ac distingui uelim. Scio equidē
uituperandos esse illos libros, qui nobis pueris lege-
bantur, & ex scriptoribus sine ordine coactas sen-
tentias habebant, breues illas quidem, & subtiles &
elegantes, sed hoc genus memoriā uastat, aciem stili
distrahit & sæpe facit, ut multa inepte scriptis in-
terponantur. Sed quemadmodum summi oratores,
quædam in forum Athenis & Rhomæ, scripta attu-
lerunt, cætera parua commentatione quasi ante de-
lineata dixerunt subito. ita etiam ego in scholis fieri
uelim, ut quæ ab oratoribus non potuisse dici uide-
antur, nisi ante domi composuerint, ea certo iudi-
cio seligantur, & adferantur in ludum. Neq; inuti-
le est in hoc loco, etiā ex alijs scriptoribus, aliquid
ad cognoscendum interpretari: Medijs sunt inter o-
ratores, & Tragicos et Epicos & Melicos, poëtæ, Historici,
historici, etiam Comici, qui & ipsi poëtæ quidem Comici.
certè sunt, sed tamen structura magis & argumenti
genere, quā uerbis atq; sententijs. Historici poetica
multa

multa habent, uerba scilicet & formas sententiarum,
 sed plura sunt oratorum. At utriq; quædam habent
 peculiaria. Nam historici temporum sæpe ut tum
 usurpabatur uocabula retinent, & liberum quidem
 compositionis genus habent, sed ad legendum dili-
 genter, quàm ad recitandum celeriter aptius. Cæsa-
 rem excipio qui oratori quàm historico similior su-
 as res quotidiani sermonis uerbis maluit conscribere,
 Itaq; hunc solum in sextam tribum admitto. Vti-
 lis enim in isto loco uoluptas erit, si inter Terentiũ
 & Plautum interponatur. Etiam Salustium darem,
 sed transfertur utilius in quartam, quod etiam in
 Plautinis malim teneri. In Terentio est, appellere
 animum, pro applicare sese, & occipere pro incipe-
 re, & pro Deum atq; hominum fidem, etiam in
 Plauto tum similia tum etiam plura sunt, & liben-
 ter uterq; postponit pronomina, in clausulis senten-
 tiarum. Sunt alia multa eius generis, quæ notare qui-
 dem pueros, sed non uti uelim nisi in re simili, aut
 cum potest fieri decore, id quod à magistro est de-
 monstrandum. Oratorum stilus genus aliud oratio-
 nis facit, & audaciores translationes similitudine
 explicat. Sic Catulus in secundo Ciceronis libro de
 oratore timide tanquam ad aliquem libidinis scopu-
 lum, sic tuam mentem ad Philosophiam appulisti,
 eodem uerbo usus est ille senex quo Terentius sed
 oratorum

Cæsar
 commen-
 tarij.

oratorum more, expressa similitudine. Sed Terentio post Ciceronem nihil utilius est: purus est sermo, & uere Romanus, uerum ut oratorem statim & recte sequitur: sic sine imitationis uicio non potest præcedere. Est enim ibi aliud orationis quàm illud genus dicendi oratorum. quod tametsi ab omnibus adiumenta capiat, uult tamen principio ex suis fontibus ut perlucidus amnis defluere. Habebunt igitur præceptores quod duabus horis in gymnasio explicent: tertia hora, id iterarem atq; redintegrarem: quod esset utilius, id quod sæpe ad stilum est accommodandum: Cum enim carminis argumentum propositum est, recte Vergilius bis recitatur. cum uero epistolæ, aut argumentationis aut loci communis, utilius in illis tribus libris de quibus dixi pergitur. Mutari hic ordo non debet, nisi cum res tempusq; postulat: Quartam horam scriptarum compositarumq; rerum emendationi damus, neq; poenitere nos debet eius temporis, quod in hac consumimus. Sed sit aliquando ut sit aliquid legendum. Itaq; libenter hoc tempore Cæsarem & Terentium proponam, alternatim & explicatione mensstrua.

Emenda-
tio cōpo-
sitionis.

Ordo quintus:

Superior annus, quasi finis est, eius discipline, quæ Latine puræ atq; apertæ est orationis, et relaxationem

DE LITERARVM LVDIS

Græca
lingua

tionem quandam præceptionis concedit: hic autem illa repetenda est, & ad linguam Græcam est transferenda. Huc usq; enim latine lingue elementis, tanquam Romæ atq; in latio uersata puericia est, nunc ueniendum ad Græci sermonis consuetudinem ceu Rhesium, aut ad aliquam ciuitatem aliam, ad quam Græci negotiatores cōmeent, & in qua ipsi doctores, quasi eius ciuitatis ciues, quæ commercium cum Græcis habet utriusq; sermonis sint periti. Sed igitur primis mensibus semel quotidie, ex Græcæ lingue grammaticis præceptis aliquid proponatur, in quibus quoniam multa cum latinis communia eademq; sunt, facilis est & cognitio & memoria. Secundum illos sex, per tres eius anni insequentes menses, fabellæ Aesopi Græcæ, paucae & faciles, conuenienter explicabuntur: quibus postremo trimestri tempore Olynthiæ Demosthenis succedent. Hæc igitur in eum annum unius horæ sit occupatio. Alterius labor in Ciceronis libris, quos de officijs scripsit, suscipiatur, si tres illi libri qui ad sextum ordinem adferuntur, sint perlecti. Non enim inutile est tertium huic loco relinquere, si absolui nisi præopera festinatione non possit. Bis in Cicerone utilius quotidie est uersari in hac curia, quam in poetis, quare tertia hora, tametsi Georgicis Vergilij destinata sit, & primis mensibus tribus legenda ea sint

conti=

continenter, tamen in sequentibus recte interponetur Ciceronis aliqua oratio, qualis est illa pro lege Manilia, aut pro Q. Ligario habita. Quartam hanc scripturæ & compositioni relinquo. uerum cōiungi huic debent Rhetorici libri de orationis ornamentis scripti, quæ ex illa enumeratione quæ est apud Ciceronem libro tertio de oratore, & in oratore, sunt petenda: sed perficienda, atq; explicanda horū præceptio ex Hermogene. Elocutio enim ideo præcedere inueniendi rationem debet, quod ad cognoscendum faciliora sunt singula orationum ornamenta: inuentio melius inter scribendum principio ultrò à pueris & à natura adhibetur, quàm ab iisdem docendo possit intelligi. Itaq; uerborum maior hic copia cōparanda est, & cumulandæ sententiarum formulæ. Nam hæ sonum & sententias ipsaq; argumenta adferunt, & sæpenumero sunt informæ atq; figuratæ. Multos uidemus qui in quotidiano sermone prudentiam præ se ferunt, at in lingua latina aut græca, parum ab ignaris atq; indoctis differunt. Hoc non rerum ignoratio, neq; sententiarum destitutio, sed uerborum penuria parit. Vtiliter igitur cum sili exercitatione atq; correctione scriptorum, coniungentur modorum atq; figurarum parititiones, quæ in tradendo singula indicari debent iuxta uero, atq; uariata commonstranda sunt in scriptoribus.

Elocutio
inuentio-
nem præ-
cedere de-
bet.

DE LITERARVM LVDIS.

Ordo quartus.

Quinto demum anno tentandū est ut æquabiliter Græcis atq; latinis progrediamur et coniungamus cum Cicerone Demosthenem, & cum Vergilio Homerum, alternatim horis duabus. Nam tertia primis sex mensibus Grammaticæ adhuc Græcæ est impendenda in qua quædam fortasse de orationis structura, & de syllabarum moris atq; accentibus restabunt. Præcepta rhetorica quartum locum cum stilo occupabunt, qui hic incipit esse ornatior, & ipsis præceptis consentiens. Omnes libellos rhetoricos Ciceronis Partitiones superant, si recte explicentur, & mandentur memoriæ. Sed præcepta Herenniana, quæ libro primo tradita sunt, in hoc loco ante partitiones prænosciuntur celerius, neq; sine fruge. Salustius post hanc præceptionem adiungi potest, & Plautus, non exemplorum gratia, quæ in Cicerone & Demosthene duabus horis demonstrantur, sed ob historiam & singulare genus orationis, in quo cum iudicio uersandum est. Sæpe enim cum decore adhibetur, elegantissimum est in oratore: ut in Cicerone Terentiana sunt, quibus sic utitur, ut non solum ornata, sed etiam necessaria fuisse uideantur. Qui huic loco præfectus est, quomodo utendum istis sit doceat, & congesta habeat;

Græca cū
latinis cō
iungenda

Partitio-
nes orato-
riæ Cice-
ronis.

Salustius
& Plau-
tus.

beat, atq; deducta per sua capita, quaecunq; lecta sunt per hosce sex annos, ita ut uulgata, & in consuetudine posita, à poëticis & historicis sint separata.

De resolutione oratorum.

HAbent enim omnes artes propriam quandam resoluendi rationem. sed eam uelim ita tractari ab oratore, ut non solum cognoscat quid factum sit ab aliquo in oratione quem uel legit uel audit, aut etiam quomodo id sit confectum: sed ut & similia ipse efficiat, & quasi quendam penum congestas omnes & res, & rerū sententiarūq; formas, & earum partes hoc est uerba habeat, & plena possideat omnia loca artis, tanq̃ copiosus & locuples pater familiās. Sit igitur illa oratorum ἀνάλυσις, Resolutio
oratoria. orationis compositae solutio, & reductio ad locos tum uerborum, tum rerum, tum artis. Quae uero reducuntur, etiam notari à studioso & congeri, & ita deduci per capita membraq; debent, ut quodcunq; in animum atq; nostram linguam cadit, etiam inuenire possimus, quibus id uerbis uel graece uel latine exprimere concinne & docte possimus. Ver = Locū uer-
borum locos appello qui in ipsis sententiarum for = borum.
mis reperiuntur. ut in his duo latent loci, Ali =
quem aliquid colere, aliquem amicitiam colere.

D 2 Partitio

DE LITERARVM LVDIS

Partitio
naturę cō
sentanea,

Partitio horum recte ex ordine naturę petitur, qui cum à nobis intellectus erit, facile ubi unum quodq; uestigandum sit cognoscemus. Est autem illa diuisio humanę naturę accommodata, qua res omnes in ea quę sunt in natura, & ea quę nō sunt partimur. Esse dico non solum θείας, & quę ὑφ' ἐσυχότα, nominantur, uerum etiam illa quę dicuntur accidere, non uem rerum adtributa, quę sunt apud Aristotelē. Nō sunt autem particule ac uincula orationis. Rursus earum quę sunt utrunq; aut diuinum est aut naturale aut humanum, neq; quicquam est in natura rerum, quod nō ad horum aliquod referatur. Quod uero diuinū est, aut est re uera id, quod esse dicitur, ut Deus, angelus, cœlum: aut falsum est & ex errore natum, ut Iupiter, Iuno. Eandem etiam diuisionē habent quę ad hæc duo pertinent atq; adhibentur, uera scilicet religio falsusq; cultus. Naturales autem res, aut simplices sunt, ut elementa & naturę quatuor. aut compositę, quę uel sensu præditę sunt, uel sensu carent. Rursus quę sensu carent, aut sub æthere in ipsoq; aëre generantur, ut fulgur, fulmen, tonitru, nubes, pluuia, nix, grando. aut ex aqua terraq; sumuntur ut mare, fluuius, insulę continentes. quę uero sentiunt similem diuisionem habent, & aut in aëre, aut aqua, aut terra degunt. Latissime fusus est ille locus, neq; hic propositum est omnia

omni a persequi. Naturalia uoco quæcunq; ortum
 & occasum sentiunt, præter hominem, cui propter **Naturalia**
 dignitatem proprium locum tribuo. Illa igitur hu=
 mana ab eo unde nominata sunt, hoc est ab homine, **Homo &**
 incipiunt. Huic Deus uitam largitus est & propter **humana.**
 hominem cætera quoq; animantia in lucem produ=
 xit. homo igitur uitæq; proponatur, ac sub utroq;
 ambos sexus marem atq; foeminam complectamur.
 Recte enim coniunguntur contraria, itaq; ex alte=
 ra parte mors etiam uitæ opponitur. Hominem præ=
 terea in corpus animumq; secamus, & ambo pro=
 prias suas habent partes, officia, situm, figuram quæ
 à medicis & physicis sunt petenda. Sed hoc animal
 quod homo appellatur, & cæteris omnibus præstat
 tria bonorum genera tanquam agros & prædia pos=
 fidet, ut animi, ut corporis, ut fortune, ut iusticia, **Triplex**
 ars, sanitas, libertas, & quæ ab his sunt orta ut à iu=
 sticia, ius, iudicium, hæreditas, proprium; alienum, **bonorum**
 poena, præmium, ab iniusticia, cedes, rapinæ, adulte=
 rium, contraria enim ut dictum iam est semper sunt **genus.**
 componenda. Omnia hæc proprias actiones, & pri=
 uatos effectus habent. In animo est cogitatio, ratio=
 cinatio, recordatio, in corpore ingressio, status mo=
 tusq;. Sed hæ actiones uel necessariae sunt, & natura
 sunt carentq; ratione. ut crescere, marcescere. item
 quasi necessariae ut edere, potare, & cæteræ quas no
 minare

Actiones
animi
peculia-
res, & cor
poris.

DE LITERARVM LVDIS

**Præcurrē-
tia, & con-
sequentia
actiones.**

**Quatuor
loci rerū.**

minare turpē est. uel uoluntaria, ut ambulatio, nauigatio. Has actiones quædam præcurrunt aut sunt coniuncta. ut locus, tempus, facultas, instrumenta, causæ, quædam uero ex omnibus consequuntur. utile, honestum, quibus adiungi sed seorsim, possunt, facile, difficile. Inter præcurrentia etiam locum habet multitudo, copia, uarietas, paucitas, solitudo. Genera quoq; rerum effectarum, nouum, iucundum, admirabile, cæteraq; eius generis recte hisce annectuntur. Operosum est hoc in loco omnia enumerare, uiam indico, per quam non difficile iter erit, quibus propositum est ingredi. Verborum igitur loci, ex hac partitione distribuendi sunt: sed distinguuntur hi ipsi loci rerum quatuor. substantia, quantitate, qualitate & duobus alijs ex quibus unū facio, actione scilicet & passione. Philosophorum hæc sunt & nomina & inuenta, sed maximas etiam oratori utilitates adferunt. & necessaria sunt in omnibus artibus ac disciplinis. Omnia igitur quæ dissoluuntur ex illis quæ esse in natura dicuntur: per hæc quatuor distincta loca requiruntur. Sed & illis quæ accidere dicimus quasi sub sensum cadant, utimur, itaq; ad primum genus & oratio & orator deportatur. Ad alterum oratio prolixa, & orator copiosus, ad tertium oratio suauis, & ornata, ut etiam suauem & ornatum oratorem appellamus, ad postremum orationem

tionem habere, & dicere, & perorare: Ita singula diuiduntur adtributa, in res & personas. Vtrunq; uel simplex est ut oratio, lingua, eloquentia. Vel cōiunctū ut oratio atq; lingua, uis eloquentiæ, sapien-
tia eloquentiæ, dicendi scientia. Oīa uero ita inter se cōnexa sunt ut antecedentia, media & cōsequentia. Attribu-
ta aut re-
rum, aut
persona-
rum.
Sic enim differunt consuetudo, amicicia, beneuolen-
tia. Naturæ quoq; ordo in actionum uarietate pote-
rit teneri, ut orationem instituere, orationem face-
re & ornare, orationem perficere & perpolire. Sed
actio etiā atq; passio per duo illa media distinguun-
tur genera. Diuisa enim suis locis sunt, aliquem ha-
bere multam orationem de re aliqua, & esse alicu-
ius orationem perelegantem & persubtilem: Ad cō-
traria uero certo ordine ueniendum est, in amicicia
enim primum est deligere amicos, deinde amare
post augere, hinc confirmare, ex hoc permanere,
florere. Offensiones etiam existunt: & irrum-
punt sepe in amicos amicorum uicia, inde ledere,
ex quo offendere, & discindere amicicias, contin-
git, tandem etiam capitali odio disidere. Sed hæc
hactenus de uerborum & rerum locis, sunt etiam
artis hoc est rationis dicendi alij loci. de quibus
in Rhetoricis libris explicabimus. Nos si Deus no-
bis uitam largietur pleniora hæc atq; perfectiora
paucis annis edemus. neq; uideo quæ uia melior

DE LITERARVM LVDIS

esse possit quam hæc, assequendi eam orationis copiam & puritatem, qua nostris scriptoribus ueteres præstant. Procul enim adhuc omnes absunt, ab eo fine quem proposuerunt, & adhuc homines iudicare melius de re facta possunt, quam perfectum aliquid consumatumq; dare.

De ratione commentandi.

Longius ab instituta oratione digressi sumus: redeundum igitur ad quintam tribum est, & addenda quædam sunt quæ deesse uidebuntur. In hoc itaq; ordine non contenti esse debemus, scribendi exercitatione, uerum memoriter etiam quædam non scripta, recitanda sunt. Argumento igitur ad narrandum, aut probandum, aut amplificandum proposito, dandum spatium est discipulis eadem hora, qua docendum erat, ad cogitandum, ut quod antea scriptum adferre consueuerant, id iam meditatione atq; cogitatione comprehensum pronuncient. Trium enim in scholis facimus dictionum genera, unum scriptum, alterum subitum, tertium quod intermedium est, & mediatum. Sed à stilo principium faciendum est, inde recte ad commentationem fit progressio: subitæ dictiones, suscipi non possunt, nisi post diuturnam & assiduam scribendi atq; commentandi consuetudinem. Commentatio recte instituetur,

Commen-
tatio.

Trium di-
ctionum
genera.

tur, quemadmodum & ipsa scriptura, in rebus notis atq; quotidianis, aut si illa latine & aliena lingua recitent, quæ in Græcis scriptoribus sunt interpretata. Quales sunt Homeri & Demosthenis narrationes, laudes, uituperationes, amplificationes, & loci communes. Sed poetica ita referenda sunt, ut foro & circulis, quàm theatris atq; orchestris sint similiora. In oratoribus etiam liberam uolo linguam, ut illa solum retineantur, quibus nihil potest esse melius. quæ uero similia sunt commutentur, si uidetur, & quæ deteriora, quod fieri solet in formis deterioribus aut uocabulis peregrinis, illa semper tollantur. Id etiam in scribendo est retinendum. Verum adiuvanda industria est teneræ ætatis magistrorum diligentia. & ut in primis ordinibus scripta argumenta dictantur à doctoribus, non inveniuntur à pueris, uerba etiam dantur & singula & coniuncta multa, sic hic prius explicandus est locus ille à præceptore, & ostendenda quæ sint insignia, & talia ut nihil præstantius, quæ item cum latinis similia quæ diuersa. Satis enim profecerit puer, si principio recte coniungit quæ audiuit, si æquabiliter pronunciet, si non erret, si scripto similia esse appareant. Post hanc exercitationem, etiam contrariæ rationes inueniendæ sunt, neq; solum quod Demosthenes narrauit, sub cōmentationem subire debet, sed etiā quæ à Media,

DE LITERARVM LVDIS

Et aduersarijs patronis uerisimile est potuisse adferri. Hæc ab illo etiam qui docet sunt præmonstranda. Vt enim optandum est qui crus fregit, illum si alteri innitatur incedere posse, ita etiam dignum maxima spe est, uel illa recte referre puerum posse, quæ ante magister uoce præiuit.

Ordo tertius.

EXtremo uero puericiæ anno, ad tertium ordinem adolescens ascendet, ubi cum præceptis rhetoricis Dialectica sunt componenda, et maior dicendi facultas, differendi ratione adiuta, comparanda est. Sed constringere oportet Dialectica ex Aristotelis libris, et exemplis philosophorum et theologorum illustrare. Sunt apud Aristotelem multa quæ non ad doctrinam artis, sed ad præceptorum demonstrationem pertinent, quæ hoc in loco sunt omittenda. Fidem enim iam nos habemus optimo magistro, suis ipse tum temporibus aduersarios habuit eruditos et doctos homines, quos nunc non habet, aut si habet, est illud eiusmodi genus Sophistarum, quod à doctissimis semper scriptoribus est uituperatum. Artis igitur probationem hic non requirimus, sed eius postulamus explicationem, et eam neque prolixam, neque operosam neque obscuram sed breuem, expeditam, et planam. In Rhetoricis autem id legendum est, quod

Dialectica,
et Rhetorica
præcepta.

quod ex differendi ratione petatum est, ut sunt Ciceronis topica. In hoc etiam ordine Demosthenis & Aeschinis aduersarias orationes, interpretando explanari uelim, sed partiandæ illæ sunt propter prolixitatem, & Demosthenis orationem ad secundam curiam, si absolui in tertia non queat, uelim transferri. Hic ille commentationes in quarta institutæ continuandæ sunt, & partes integræ, in utriusq; oratione postquam enodatæ sunt, sumpto ad cogitandum tempore, oratione latina memoriter dilatandæ: Ea exercitatio recte adulescentulis, cum dimittuntur imponitur, & audiuntur domo reuersi. Surripere igitur huic labori quartam horam oportet: quæ cum per tempus & recitationem earum rerum quas cogitatione & meditatione habent complicatas licebit. legere etiam utile erit, Historicum Salustium, aut Cæsarem. ad Liuium tum cū illi lecti erunt. perueniatur. Magnus ille quidem scriptor est, sed obseruator ætatum, & oratori dissimilior, quàm Cæsar & Salustius. Thucydides enim magis Liuius quam Xenophon placuit, quæ secutus est Cæsar. Salustius rerū breuitatem, uerborū usu distincto & accomodatione propria cōpensat. Topicis Ciceronis de quibus dictū est, haud scio an Hermogenes rectis præponetur, certe legēda in hoc ordine tibus.

Hermogenes de stylisticis.

DE LITERARVM LVDIS

ordine sunt quæ de statibus scripsit. Ita enim loco secundi libri qui est in Herennianis substituetur. Primus in quarto ordine interpositus est: quæ in quarto libro docet Herennius illa in quinto proposui explicanda. Tertius liber, quæ de memoria habet, non lim explicari. Impedient enim cursum nostrum, & artis observatio, & Dialectica præcepta magis quàm illa, memoriam augent & stabiliunt.

Ordo secundus.

Postquam ingressus est, adolescentum cœtum, qui antea puer erat, mature ubi annum in tertia tribu uersatus est, ad secundam progreditur: in qua finem ornatæ orationis præcepta et principium apti generis dicendi reperire oportet. Sed quæ finitima sunt, non solum continuari debent, uerum etiam coniungi atque necessitudine uinciri. ita & in ornatu id quod decet inchoari, & in eo quod decet ornatus perfici debet. Tarde Cicero & tum cum sciret quid aptum, quidque ineptum esset, didicit remota inhibere quid esset? Tironem etiam docuit, tum cum limari ab illo sua scripta pateretur, ineptum esse fideliter inseruire uoletudini. Quamobrem coniunctam habere debent exercitationem, sed in præceptione tenendus est ordo, & modus, de quo explicatum est. Demosthenis igitur oratio quam
pro

pro Ctesiphonte habuit si in tertia classe non potuit exponi, hic explanetur. Si uero ibi explanata sit, delegatur ex cæteris quæ uidebitur idonea. Dialectica præcepta, de quibus scriptum est ita cogi & explicari debent ex Aristotele, ut duos annos in illis maneant adolescentes, sed tamen in hoc loco exercitatione magis, quàm præceptione sunt erudiendi. Itaq; eadem hora qua præcepta docentur, dialogus aliquis ex Platone aut Cicerone interponatur, in quo demonstretur utendi modus, & recta doceatur disputandi ratio. Partitiones etiam Ciceronis hic proponendæ sunt, ad illustrandam firmandamq; memoriam. Vtilissimus hic libellus est, ut antea proposui, & in omnibus scholis retinendus, sed explicandus expedite. Pergant etiam in commentando & scribendo adolescentes, & seuerius iudicium scriptis corrigendis adhibeatur. Incipiet enim iam sese stilus foras efferre, & expectare omnium ordinum iudicia. Post cognitæ partitiones ueniendum est ad Ciceronis oratorem, ubi breui indicatur quid deceat, & quas res oratorem habere oporteat, & quomodo perficiatur. Isto enim anno fundamenta operis perfecti iacienda sunt, quod uigesimo primo absolutum uolumus uidere.

Exercitatio magis quam præcepta hic requiruntur.

Ordo primus.

Decimus

DE LITERARVM LVDIS.

Aptum di-
cendi ge-
nus.

Decimus quintus annus libertatem adolenscens-
tibus promittit, & uia ad primas artes maxi-
masq; disciplinas patefacit. Post hac enim conandū
est ut illud aptum genus dicendi adhuc adolenscentes
consequantur. Aptum appello, quodcunq; literarum
est, & doctrina illuminatum, & liberale, & rebus
personisq; accommodatum. Hoc teneri haudqua-
potest absq; maximarum atq; adeo propē omnium
rerum cognitione. Et quanq̄ ne ornatus quidem as-
fingitur honestus, sine liberali artium atq; Philoso-
phie doctrina: tamen quo perficitur hinc habet,
quod ex apto defluxerit. Quæcunq; igitur philoso-
phus summiq; uiri profitentur, elaborare decet ut
adipiscamur: qua uero uia ad huius studij arcem per-
ueniamus, paulo post aperiemus. Ergo tenendi ad-
huc sunt, hoc anno sub magistris & maiorum rerum
facienda principia, & discenda ea sunt, quæ postquā
affecutus est adolenscens, publicis doctoribus com-
mendetur. Proponendus igitur hic est liber Aristo-
telis *ἡ ἐτικῆ*, & alter liber eiusdem scriptoris
de mundo, qui duo eodem anno, una aliqua hora quo-
tidiana facile percipiuntur. Tradenda etiam Arith-
metica sunt, & excutiendus Mela, & proponendus
Proclus, & cognoscenda sunt Astrologiæ elementa.
Demosthenes adhuc etiam & Homerus interpreta-
buntur, quibus Ciceronis oratorios libros adiungo.

Aristote-
les de in-
terpreta-
tione itē
de mūdo.

Dandū

Dandum etiam ocium scripturae & stilo est, neque deponenda commentandi exercitatio. Denique quid superiori & proximae disciplinae desit, & quid principio sit opus in sequenti, diligenter oportet considerare.

De festis diebus, & de sacris lectionibus:

HActenus percurrimus omnes classes, & tribus tim omnem puericiam digessimus: sed quoniam pietatem finem statuimus studiorum, & de sacris literis nihil diximus, de his aliquid etiam est praecipendum. Festi igitur dies huic auscultationi comparati sunt, quam rursum in duas partes distribuimus. Vna seorsum a populo in ipso ludo constitui debet, inde continuo ad alteram & ad publicam ducenda tota multitudo est, & collocanda cum populo. Verum in concionibus ordo praescribi non potest: est enim ibi seruiendum tempori. Modestiam autem & silentium, & attentionem summam esse oportet, in primisque cauenda est omnis populi offensio. Imaginem enim honestae disciplinae, iuuentus praese ferre debet. Ornamentum non minimum ciuibus adfert, liberorum modestia, sanctimonia, studium: dehonestant Rempublicam, qui secus quam deceat, faciunt. In puerili gymnasio, curandum est, ut antequam ad liberas auscultationes ueniantur,

Studiorum
finis pietas.

DE LITERARVM LVDIS

ueniatur; cognitam habeant adolescentes, omnem Christi atq; Apostolorum historiam, & ex Moyse quædam præcipienda sunt, quibus rerum gestarum & antiquitatis memoriam collegit, & utilia sunt ad cognitionem doctrinæ Christianæ. Festis diebus etiã is qui præcedit coniungi decet, in illis ciuitatibus, quæ unius diei solum uacationem habent. Postremo ordini cathéchismus explicandus est. tribus insequentibus, latino sermone uersum esse debet id quod interpretatur. Cæteris melior oratio, sermoq; græcus utilior. Duobus etiam primis Hebraica grammatica tradi debet, & cum primum fieri poterit, in ea lingua Moyse interpretatione est explanandus.

Hebraica
gramma-
tica.

Hoc modo primus, atq; postremus dies, Deo dicandus est, qui intermedij sunt, illis recordationem quidem et cogitationem diuinitatis deponere non licet, eloquentiæ tamen & philosophiæ studia licebit recolere, sed ita ut ad illustrandam religionis doctrinam suscipiantur. Pomeridianis horis, postremo die hebdomadis, in Muscis omnes exercendi sunt. Liberalis enim est huius artis & scientia, & usus, & nisi à pueris cōdiscamus, sero grandiores cognoscemus.

Musica.

De publicis & liberis lectionibus.

Publicorum professorum collegium, tanq̃ populi liberi ciuitas est, in qua populus ipse sibi leges con-

ges constituit, & quibus ipse se astringit: qui uero in nouem ordinibus uersantur, quasi patres familias sunt, qui ut liberis ita discipulis suis imperant, quod honestum putant. Sed cum lex sit, qua Deus uniuersum mundum regit, nihil est quod omni ex parte legibus sit solutum. Itaq; ut liberum populum, ita etiã istas auscultationes propter illas pueriles, in quibus indulgetur minus, appello liberas, sed tamen certis legibus distinctas. Qui igitur summis, suisq; doctoribus proximi sunt, sed tamen longo interuallo proximi, admitti debent ad hunc cœtum. Finis enim studiorum non ita procul ut ante, uideri potest, quem quisq; inde ab initio debet proponere. Fecimus autẽ unum & primum studiorum finem, pietatem literatam, sed multis illa certe modis exercetur: & diuini se ipsa patitur in uaria officia, tanquam partes. Manet enim ipsa non in Theologis solum, uerum etiam in iurisperitis, & medicis, & in omni professione manet. Et docere religionis ignarum, & defendere innocentem, & curare ægrotũ, ad charitatem atq; Christianã religionẽ pertinet. Primum igitur unusquisq; se in consilium adhibere debet, deinde etiam magistros & parentes, & amicos aduocare, atq; providere ad quod uitæ genus sit aptus. Ad quodcunq; uero idoneam se naturam habere sentiet, ad id & consequendum & ornandum, omnes et cogitationes

Varia pietatis officia.

DE LITERARVM LVDIS

gitationes, & lectiones, & scriptiones, & auscultationes referat, atq; ita referat ut in eo cæteris conetur præstare. Deprauatū genus est hominum, etiam eas quas ignorant artes exercentium, & qui eo ingenio sunt, neq; theologi, neq; iurisperiti, neq; medici, neq; doctores ulli sunt ferendi. Non enim illud sine miserabili iactura fit acuminis, ualitudinis bonorū, & mentis. Neq; quisquam se potest excusare multitudine, qui minus sit affecutus, quàm profiteatur. Sed ut in theologia, ita etiam in cæteris disciplinis, summum est, animi integritas, metusq; Dei. minusq; nocent indocti, si sint boni, quam docti, si negligant uirtutem: uterq; tamen in uicio, sed minus alter, uerum in uicio tamen, qui dum id suscipit quod efficere non potest, uel priuati propriiq; studij, uel impudentiæ, uel stultitiæ, & inertia significationem præbet. Sit igitur is qui ad publicum ludum & istam liberalem disciplinam deligitur, natura ita bonus, ut uelit: & ita industrius ut possit, ita etiam erecto & alacri animo, ut nolit exercere priusquàm eam quam sequitur artem, didicerit: atq; cum hac uoluntate ad doctores ac magistros deducatur.

**Integri-
tas animi
& Dei ti-
mor.**

Quales publicæ interpretationes,
& quales priuatæ lectio-
nes esse debeant.

Sed

Sed habet unaquæq; sæpe ars scriptores multos, Suariosq; libros, & multiplicem præceptionem, quibus in rebus electio est facienda. Incidere igitur in libros inconsiderati hominis est: summo cum consilio, summoq; iudicio qui prudentes sunt, accedunt. Quia in re multos illa uulgata sententia sefellit, nulum esse librum tam malum, qui non aliquid boni habeat: sed ad id genus tum est tandem ueniendum, cum quod optimum est, & quod obscuritatem magnam habet, & sine quo habere id quod sequimur, non conceditur à natura. Non omnia possunt etiam quæ utilia sunt explicari in scholis. Itaq; necessaria & optima ex optimis autoribus deligere præceptores oportet, cætera relinquenda priuatis studijs sunt sine quibus impedita atq; imperfecta doctoris industria est. Autorum explicatores, domi leguntur utilius, quàm interpretentur in schola: Vt enim ineptum esset Bartholum à iurisperitis recitari, Iustiniani scripta negligi: & ut imperite, ac fœde fecerunt Sophista, qui Scotum & Thomam interpretati in suis cœtibus sunt, ita peræq; propè illi atque hi, qui in explanandis Aphorismis, atq; similibus Hippocratis scriptis, Galeni commentarios exponunt & interpretantur. In sacris literis, quod præter Euangelistas, & epistolas Apostolorum, & Mosis atq; Prophetarum libros explicatur, propè totum

Cōmentaria priuatim legenda.

DE LITERARVM LVDIS

intempestiuum est. Ne Chrysostimū quidem aut Basilium, & his æqualem Gregoriū legendum in gymnasijs theologorum censeo : sed domesticis studijs committo. Idem ego de omnibus Philosophiæ studijs iudico. Poëtæ excutiendi sunt, qui graues sunt, & ad intelligendum difficiles, post bene perceptum Vergilium & Homerum : & quoniam multa sunt Poëtarum genera, ab utilioribus est incipiendum. Ouidius propè in omnibus facilis est, ideoq; relinquendus bibliothecis & legendus domi. Fastorum tamen libri, & utilitatem habent, & difficultatem. Metamorphosis legi omnino debet, at scholæ curriculum impedit. Necessaria magis est Comicarū & Tragicorum Græcorum explicatio : sed non omnium, uel Tragœdiarum, uel comœdiarum, sed Comicorum & Tragicorum omnium, sunt enim insignes ut Euripides, Sophocles Aeschylus: Aristrophanem propter nubes, & calumnias aduersus optimum philosophum Socratem fictas atq; conflatas de ludo eijcerem, nisi utilitas in eo tanta esset, ut cum optimis comparetur. Pindari hymni, & Horatianæ odæ recte componuntur & leguntur. Idem de Vergilij ælogis & Theocriti Idyllijs statuo, sed Vergilius puerili ludo & inferiori ordini aptior est. Theocritus in hisce liberis scholis collocandus. Præterieram Hesiodum, qui cum primis est legendus, neq; male Homero suc-

Graues,
& diffi-
les Poëtæ
explicādi

Comici
& Tragi-
ci.

Aristo-
phanes.

ro suc-

ro succedit. Aratum mathematicis cum Dionisio re-
linquo: Lucretius Philosopho dignus est, sed tamen **Lucreti-**
concedimus illum ocio poëtarum. est in illo uetustas **us.**
uerborum, & sententiarum insignes formæ sunt, cū
de diuinis ac naturalibus rebus agit. Multa habet
quæ uel oratorem deceât. Olim grammatici poëtas
interpretabantur, poëtæ uero tantum sua recitabāt
nostra tempora requirunt, ut idem sit & gramma-
ticus & poëta: In historijs facilis est lectio. Nostri
scriptores sine interprete cognosci possunt. Ex Græ-
cis Thucidides, & Herodotus, & Xenophon, si in-
telligentur, cæteros domi licet cognoscere. Ex Thu-
cidide sententiarum grauitas, & plenorum uerbo- **Historiæ**
rum collocatio, ex Herodoto lepos & profluens ge-
nus compositionis, ex Xenophonte suauitas & pu-
ritas orationis locupletatur. Deniq; multa Herodo-
tus, plura Thucidides, Xenophon nihil non habet
quod sequaris. Hos tres Cæsari & Salustio, quos de-
di inferioribus ordinibus sentio adiungēdos. Liuius
etiam opus habet explanatione, sed pars quædam
eius est delegenda. neq; tres illos uolo absq; intermis-
sione totos legi: post singulos libros plerunq; per-
mittitur nouæ materiæ interpositio. Ex philoso-
phis illa legi & proponi uolumus, quæ necessaria **Quæ ex**
sunt, & à doctoribus cæterarum artium non expli- **Philoso-**
cantur. ut Dialectica, Ethica, Politica, & Physica, **phis præle-**
genda.

E s quæ

DE LITERARVM LVDIS.

que à mathematicis & medicis non leguntur, ut libri Aristotelis de anima, & de naturalium rerum auscultatione, & Platonis Phædo. Animalium historia, & humani corporis compositio, & herbarum vires atq; notiones, & Platonis Timæus, & similitè rerum libri cum medicis ad exponendum diuidi possunt. neq; potest mathematicus ea ignorare, quæ sunt apud Aristotelem de cælo & mundo, quapropter hi duo philosopho adsint, qui non omnia simul docere potest, tametsi omnia debeat scire atq; profiteri. Iurisperiti etiam non omnia quæ sunt apud Iustinianum necesse habent excutere, quædam discipulorum sunt reliquenda industriæ, sed quæ necessaria sunt, & uiam atq; rationem habent, et insignes utilitates adferunt, in illis professio suscipienda est. neq; ignarus potest esse, ut nec consuetudinis & iuris, sic etiam quæ de moribus & Rep. à philosophis sunt explicata. quapropter etiam hic postq̃ aliquid in sua arte absoluit, ex philosophis potest adferre quædam cum est in hac literarum disciplina necessarium ad absoluendum istud annorum quinque curriculum. Neq; immunis Theologus, qui scire debet, quomodo Respublica sancte gerenda sit, & quomodo cuiq; inter ciues suos, & in sua familia sit uersandum, quare ad huius etiam officium pertinet docere cum est opus.

De Aristotele, Platone, & Cicerone.

Sed ex quibus sumenda sint quæ traduntur facili
 est consideratio. Habent enim omnes artes suos
 autores in quibus errari non potest. Theologia duo
 genera certissima, perpetuaq; scriptorum habet. A=
 pud medicos Hippocrates ac Galenus perfectam ar=
 tem confecerunt. Apud Iurisperitos nihil melius est
 quam quæ Iustinianus edi curauit. Philosophis Ari=
 stoteles datus est, qui præter tot tantarumq; rerum
 explicationem, qua prope omnia docet non solum
 eam artem perfecit, qua in omnibus artibus utun=
 tur, & quam ad omnem disputationem adferunt, sed
 etiam dicendi rationem pulcherrima doctrina dila=
 tauit. Plato inter philosophos copiosissimus & am=
 plissimus autor, dialecticorum exempla omnia sup=
 peditat. neq; mihi dubium est, dialecticos in arte per=
 ficienda multum Platonis uestigijs adiutos esse. Sed
 & orator quàm plurima notare apud Platonem
 potest, quæ in dicendo imitetur. Inter sapientes
 eloquentiæ laus summa, & inter eloquentes sa=
 pientiæ locus primus huic philosopho debetur.
 Ita copiosus est in eius sermonibus Socrates, ut
 quodcunque demas id te credas amisisse, ita docet ut
 discere uelle uideatur, ita concedit ut uincat, ita uin=
 cit ut non id uoluisse appareat. Itaq; post pueritiæ

Cuiusq;
 artis auto=
 res per=
 fecti.

Aristote=
 les.

Plato.

DE LITERARVM LVDIS

educationem interpretandi sunt huius dialogi, in quibus amplitudinis quidem & doctrinae delectus haberi non potest: sed tamen ad studiorum progressionem & ad ludi distributionem necessaria quaedam & ratio & electio poterit accommodari. Quod uero nomen inter graecos philosophos Plato, id inter Latinos oratores Cicero est consecutus, sapientissimus orator, eloquentissimus philosophus, oratorum omnium clarissimum lumen, & unicum omnium litteratorum exemplum. Summa laus apud hos tres manet, & ut uideo mansura perpetuo est: & cum omnia cognoscenda sint, quae scripserunt, tamen quoniam ab uno atque altero interpretari omnia non possunt, partitione opus est, ut doctorum unusquisque quod suam artem ornare posset, putet ad se pertinere. & quoniam ne sic quidem omnia legi possunt, seligi primum necessaria deinde optima debent, caetera priuatis studiis atque bibliothecis concredenda.

Distributio publicarum lectionum.

Communicare igitur inter se doctores docendi munera oportet, & distribuere operas, quod si facient, & in curijs inferioribus firma fuerint posita fundamenta, facile reliquum opus exaedificabimus. Sunt autem lectorum atque doctorum nouem genera. Vnum quod sacras literas explicat, quod primum est

Cicero.

Nouem
lectorum
genera:

mum est & summum: alterum iura legesq; interpre-
 tatur, tertium quod conseruandæ recuperandæq; sa-
 nitatis præcepta tradit. Atq; in his tribus exercetur
 uita humana. Quicquid enim agunt homines, faciūt
 id aut animi mentisq; causa, quam Deo deuotam uo-
 lunt: aut ob uitæ custodiam atq; productionem: aut
 ut sua honeste tueantur, amplificent, tradantq; quasi
 per manus nepotibus. Nostris paucis hisce sæculis
 qui horum trium doctrinam consecuti essent docto-
 res uocari placuit, nouo uocabulo in hac significa-
 tione. Vnaqueq; enim ars suos doctores habet, quæ
 admodum rhetorica Hermeten & Hermagoram ha-
 buit, et Grammatica Aristarchum. Sed sunt quidam
 quibus horū trium professio, uel difficilior est quàm
 ut assequantur, uel non exercere cupiunt: ociumq;
 quod malunt sequuntur. Itaq; quartum genus quod-
 dam est, quod se mathematicis dedit, in eoq; ætatem
 consumit. Est etiam quintum amans antiquitatis,
 quod in legendis scribendisq; historijs cōsultum esse
 cupit sibi uitæq; humanæ. Quidam etiam excellen-
 tes ad lætitiā nascuntur ingenij ui, & impetu men-
 tis plurimum ualentes ideoq; numerosum genus ora-
 tionis, sequuntur, quod est poëtarum. Nonnulli uero
 philosophorum sunt administri, ut dialectici, aliqui
 oratorum, ut rhetores, aliqui poëtarum atq; histori-
 corum ut grammatici, quod genus nos hodie in pul-

Theolo-
 gi.
 Iurisperi-
 ti.
 Medici.

Doctores
 uulgo.

Mathe-
 matici.

Historici.

Poetæ.

Dialecti-
 ci.
 Rhetores
 Gramma-
 tici.

DE LITERARVM LVDIS

uerem detrudimus, & molestissimis astringimus laboribus: minimum nunc inter cruditos, olim uero professione magnum. Itaq; de hoc dictum est ante, nunc de his octo est explicandum.

De consensu artium & rerum omnium, & de numero lectionum.

Philosophus sciē-
tiam rerū,
orator eo-
rum quæ
sciri pos-
sunt uerū
ornatum
proficitur:

Discipli-
næ inter se
connexæ.

Sed in his octo philosophum atq; oratorem con-
tinere uolo, quorum uterq; omnia posse pro-
fiteri atq; suscipere uidetur. sed alter scientiam
rerum, alter dictionem uerumq; ornatum illorum
quæ sciri possunt pollicetur. Vt igitur hos duos in
horum omnium de quibus dictum est, scholis uersa-
ri atq; educari uolumus, sic etiam hi in minorem nu-
merum poterunt constringi. Nemo enim omnium
perfecte unius alicuius doctrinæ scientiam consecuta-
tus est, qui ceteras ignoret. Omnes enim res quæ in
natura posite sunt, quæue ortū & occasum habent,
perpetuo & sempiterno connexæ sunt inter se uin-
culo quodam societatis: & quemadmodum res sic
rerum etiam disciplinæ perenni sunt constrictæ ne-
cessitudine, ut qui unam earum perfecte norit, re-
liquarum quoq; profiteatur se non esse ignarum. Cō-
trahamus igitur octo illa genera, & ex paucioribus
magistris gymnasium constituamus. Nam & poeta
ille etiam historicos interpretari poterit & gram-
maticam

maticam pueritiæ præfecimus. Quocirca septem sunt qui docebunt quotidie, ita ut neq; horas neq; scriptores eosdem occupent. Etiam eiusmodi uiam poterunt atq; rationem ingredi, ut unus ex omnibus artibus ac literis quantum satis est ad excellentem doctrinam consequatur. De iurispudentia & de medicina, & Theologia nullum dubium est, quin qui discere tantū non potest quinque illis annis si unam quotidie horam uersetur in scholis, ut per se reliqua assequatur, ineptus sit ad illam doctrinam ad quam se applicarit. Neq; dubium aut ambiguum est, poetam illum atq; historicum iactis his initijs quæ in illo inferiori gymnasio fieri uolumus, tantum quinque annis efficere posse, ut in omnibus scriptoribus egressus adolescentiam iuuenis expedite sine interprete uersetur. Dialectico plus oneris impositum est. Nam quoniam Philosophi, qui prope solus omnia profitetur, administer est, rationem differendi, & perspiciendi atq; diiudicandi omnem debet tradere. uiam etiam patefacere ad earum rerum scientiam, quæ de moribus & uita, & quæ de rebus naturæ à maximis uiris, hoc est à sapientissimis tradita sunt, & cognitione in hac uita quantulacumq; est comprehensa. Quia in re adiutorem illum rhetorem habet, oratorum famulū, qui non solū dicendi præcepta dare atq; perficere debet, sed etiam

Septem
doctores
publici.

DE LITERARVM LVDIS

sed etiam ea cognoscere omnia, quæ in oratione subtili acumen subeunt, & suscipiunt orationis cultum conuenienter ac honeste. De differendi ratione nemo melius Aristotele explicari potest. Rhetorici libri extant complures, sed tres illos Aristotelis, & tres de oratore, & Hermogenis quos scripsit de dicendi formis uiciosum est ignorare, reliqua quæ de moribus præcepta sunt & scribuntur de natura, à Platone & Aristotele sunt petenda. Sed & morum optimus informator, & in ciuitate præclarus consiliarius theologus est. Percurri breuiter quæ de his septem doctoribus sentirem, cætera institui commodius quam præcipi possunt.

Quæ lectiones theologo, quæ iurisperito, quæ medico, quæ cæteris sint audiendæ

Qui igitur necessarias illas tres hominum uitæ artes cognoscere uolēt, ita in his eos uersari oportet, ut à cæteris artibus ac literis, quibus adiuuari hæ tres possunt nō deficiantur. Itaq; ille Dei quasi interpres, & cælestium rerum præco Theologus neq; ignarus sit differendi, dicendiq; scientiæ, & eos cognoscat, à quibus conseruata est antiquitatis memoria, & præscripta ratio constituendarum Rerump. atq; familiarum. Iurisperitus uero, indignus eo nomine est, si quæ de Rep. & moribus

moribus philosophi statuerunt, ignoret, & amouen-
 dus à sua curatione, si non cognouerit: quid maio-
 res eius, à quibus leges accepit, egerint, neq; legerit
 ætatum omnium historias. & quoniam Christiana
 Resp. quasi imaginem diuinitatis exprimere debet,
 tenenda etiam sunt illa, quæ Deus literarum moni-
 menti mandari à sacrarum rerum scriptoribus uo-
 luit, & cum è ludo iurisperiti multi prodeant regū
 cōsiliarij, & gubernatores Rerump. uox quoq; eius
 rhetoricis præceptis est erudienda, & quia sæpe
 disceptandum est de iure scire cum cæteris & illa
 debet quæ traduntur à Dialecticis. Medico etiā mul-
 ta necessaria sunt ad artis suæ perfectionē. Nisi enim
 illa habeat quæ philosophi de rebus naturæ expli-
 carunt, non poterit cum magnis numerari. à philo-
 sophis igitur & mathematicis multa cognoscenda
 sunt, si iustum curriculum suæ professionis uolet per-
 currere. quo in studio, si differendi scientia destitua-
 tur, deficient etiam ea quæ in perfectis medicis sunt
 summa. Non infinita sunt ea quæ præcipimus, uix
 credi potest, quantas & quam multas res humanus
 animus annis quinq; possit perlustrare, post illam
 puerilem disciplinam. Difficilis est fateor & plena
 fastidio sex horarum auscultatio, at qui quatuor re-
 cusat, haud scio an dignus ut appelletur sapientiæ
 studiosus uideri debeat. In hoc igitur publico & li-
 terato

Quæ N
 dicus.

DE LITERARVM LVDIS

terato gymnasio, ut in illo puerili quatuor horas
 quotidie doctorem audiat, qui uolet esse magnus,
 aut theologus, aut medicus, aut iurisperitus. Ita ue-
 ro quatuor hæc tempora dispenset, ut quinto sex-
 toq; atq; etiã septimo carcere possit, ita uero illi sex
 interpretes sua tempora distribuunt, ut quæ singula-
 ria sunt artis et cætera studia non multum adiuuent,
 tum legant cum parti alicui utilius est alia cogno-
 scere. Neq; enim necesse habet theologus audire me-
 dicum, cum tradit curationem oculi. at cum anato-
 mica docet, & humani corporis partes & partium
 singulorum actiones & figuram indicat & ocu-
 lis subijcit, ac quasi contrario ordine quam eo, quo
 factum est, animal in quo mens est, resoluit, eò utili-
 ter & poeta & Theologus accedit. Cum igitur li-
 ber Galeni de pulsibus legitur, minui potest labor
 Theologo, cum Iuris interpret singularia quæ in Iu-
 stiniano sunt capita explanat, abesse potest, at cum
 quatuor illi libri interpretantur, quibus informa-
 tur iuris consultus, non potest sine inertiae suspicio-
 ne abesse. Sunt omnium artium scholæ quædam, quæ
 ad omnes non pertinent, quæ ita digerendæ sunt, ut
 studiorum continuationem non disturbent. Quod
 de tribus dictum est, id etiam ad illos pertinet, qui
 in nulla professione necessariæ doctrinæ ætatem de-
 gunt, neq; certis limitibus sese coërceri patiuntur,
 sed ocio

sed ocio tantum & literarum oblectatione acquiescunt: quibustamen ita uiuendum est, ut illorum etiam uitæ ac studiorum ratio apud amicos constet. Nam quo liberior est, & quo minus se arctioribus artium atq; literarum locis includi patiuntur, eò plus possunt percipere.

De duplici partitione in oratione docendi.

Tenenda igitur in scholis duplex uia & ratio est. Vna est qua generatim res uniuersa traditur, nulla disceptatione cum aduersarijs suscepta. altera singularium rerum, quæ proprias quasdam habent & exceptiones, & quæstiones, & demonstrationes. Est etiam altera partitio, quam maxime sequi in scholis utile est. Aliquando enim sine autore, nulloq; proposito scriptore ars aliqua docetur, tum cū magister id potest breuius & planius quàm hi qui de eadem re scripserunt: id quod fieri potest in multis: aliquando etiam liber adfertur in quo rursus bipartitus est modus in docendo. Nam aut oīa ordine atq; singulatim excutiuntur, aut quedam omittuntur, & ea solum aperiuntur quæ sunt necessaria, quod in multis fieri potest apud Aristotelem & Galenum aliosq; scriptores multos, quibus aliter quàm ars ipsa desiderabat, propter aduersariorum opiniones explicandum de rebus fuit. Itaq; illa generalis

Genera-
lis artium
traditio.

DE LITERARVM LVDIS

generalia quotidie, nisi à quatuor tradi debent, quò omnibus cognoscere liceat, tres uero semper sint, qui illa, quæ singularia sunt, & redacta in angustos quasi carceres earum artium, quarum quæstiones habent, eos doceant, quos proprios perpetuosq; auditores habent. Hoc modo assequemur quod uolumus, ut intelligamus ac teneamus illam omnium artium atq; literarum consensionem.

De priuatis studijs.

AT parum adferunt utilitatis scholæ, si secreta studia domi nulla instituantur. Etsi enim nulla sine interprete ars perfecte percipi potest, & magnam uim ad excitandum eius qui docet uox habet, tamen in eodem sunt uicio, & qui nullam exercitationem domi suscipit, et qui se non sinit à doctore erudiri. Sed utrunq; suas habet & commoditates & impedimenta. Nam qui in cœtu cum multis instruitur, is hoc quasi emolumentum capit, quod quæ domi magno cum labore uix consequi possit, ea ipse breui auscultatione, certius & perfectius cognoscit quàm si sua inuestigatione nitatur. illud uero est in eadem re incòmodi, quod se penumero mentis acies in ludo turbatur, & animus ad alienas cogitationes rapitur, quod in nostra bibliotheca cum assidemus, tametsi accidat etiam, tamen quæ ibi aguntur, quæ-

runtur,

Utilitas
publicæ
auscultationis.

runtur, inueniuntur, quasi priuata sint, & à nobis nata sic amplectimur, ut firmitus animis inherescant. Sunt aliæ multæ utilitates utriusq; rationis, ut nisi coniuncta sint hæc duo, paruos progressus in literis facturi simus. Sed in frequentia, & in publico conuentu simplex labor suscipitur, in quo diligens attentione, firmaq; memoria requiritur: ille uero secretior locus duarum rerum curationem præscribit. Vna est ut reuoluat, quæ in ludo tractata sunt, ut & singula intelligat, & quæ distracta fusaq; sunt ad communes generum summas reuocet: altera ut ea priuatim legat quæ doctoris industriam subleuent, et quarum uis sepe id quod tantum inchoatum à præcepto re notatur, perficiatur, ut plenus progressus, expeditus ascensus ad arcem doctrinarum fiat. Sæpe etiã accidit, ut uel morbo impediti, uel occupationibus necessarijs auocati, non adsimus cum docetur: aliquando etiam utile est, aut comœdiæ, aut orationis, aut historici libri recitationem præterire, tum cum uacamus melioribus, quas incommoditates priuata diligentia, nostraq; bibliotheca compensat, si sine magistro & interprete nos eadem assequamur. Semper aliquid ei qui uolet esse magnus est aut querendum, aut audiendum, aut legendum, aut disputandũ: qua in contentione cum soleat satietas & fastidium esse reficiendus animus uarietate, relaxandus inæ-

Duo priuatis studiis agenda.

F qualitate

DE LITERARVM LVDIS.

qualitate, ut facilia grauibus, leta tristibus, noua ueteribus succedant, & à lectione ad scriptionem, à scriptione ad ludum, à ludo ad sermonem eruditum, & literatam familiarium cōgressionem accedatur.

De disputandi & declamandi consuetudine.

PRæscriptum iam à nobis est, quò puerilis educatio instituenda sit, & quomodo quinque illi anni postremi ad perfectionem studiorum sint impendendi. sed de discipulorum exercitatione quæ in ludis suscipi solet nihil est hactenus explicatum. Sunt autem eius consuetudinis duo genera, unum disputandi, alterum declamandi. Disputandi morem bis per mensem repeti moderatum laborem habet. Hic ut excitatio adhibeatur, quatuor sunt personarum genera comparanda, Vnum eius est qui respondebit. alterum eorum qui subsidium adferent. tertium id est quod in aduersariorum subsellijs sedet. quartum quod uniuersam disputationem moderatur. Hæc quatuor in duo contrahi possunt, ut unum differentium sit, alterum iudicantium. Qui uero quæstionis capita proponit, unus sit, isq; solus interrogetur ab his qui contra differunt: Sed quia fit sæpe ut subito nobis in mentem non ueniat, quod commodè respondeatur, addi huic tres debent, qui quasi subsidio ueniant: sed dandæ illis respondendi partes sunt, ab eo qui

qui omnibus præest, ne perturbatio oriatur, & ne se impediunt mutuo, qui tanquam in conuiuio rex sit, & unicuique quod uidebitur imperet. Iudicare autem hunc non prius oportet, quam recurrat interrogatio ad primum. huic enim illud concedendum est ut bis rogetur: Liberalis decet hunc cœtum disquisitio, carens metu & stupore, uerum alacritas adsit & reuerentia. Itaque is qui iudex constitutus est, estimatoris se partes, non obiurgatoris sciat sustinere. Pudor enim subrusticus & metus, etiam quæ meditata scriptaque habemus, tollit, alacritas uero & excitatio multa sæpe subito, & ex tempore inuenit, quæ cum domi sumus, nobis in mentem non ueniunt. Res etiam ipsa quæ ad disceptandum proponitur, talis sit, ut in contrarias partes uerisimiles sententias habeat, id quod non solum in probabilibus fieri potest, sed necessaria quoque pronuntiata sæpe habent aduersarias opiniones, quibus uidentur infirmari. Conclusiones & argumentationes apertæ, breues, atque simplices, & singularum partium interrogationes, utiliores principio sunt, quam perpetuæ & prolixæ orationes, & argumentorum multitudo: ad quas tum ueniendum est, cū facultatē disputandi fuerint maiorem consecuti. at in his ipsis longis probationibus, siue scriptæ adferantur, siue nascantur ex ipsa cōcertatione, epilogi breues atque

Officium
eius qui
disputati-
oni præest

Quæ in
discepta-
tionem
uocanda;

DE LITERARVM LVDIS

Breuitas
disputati-
onibus
aptis.

concinni faciendi sunt, qui efficiunt, ut intelligen-
ter disceptent. Sed aptissima disputationibus breui-
tas est, & ad intelligendum, & ad uitandum insidias
aduersariorum, idonea. Suspecta enim est propo-
sitionum conglobatio, & sæpe à Sophistis adhiberi
solet. Protagoras quidem à Socrate facete laudan-
do irridetur, quod & copiose & breuiter interro-
gatus respondere possit: at ab eodem oratores uitu-
perantur qui *σμικρὰ ἐρωτῶντες δόλιχον κα-
τατείνουσι τὸ λόγον*. Sed hæc de disputandi con-
suetudine: declamandi uero exercitatio, non solum
ad uerborum uolubilitatem sed etiam ad præcepta
philosophiæ est accommodanda. ut non solum diser-
ta sed etiam sapiens sit oratio. Triplex autem eius
est tractandi uia, aut enim subitæ dictiones fiunt,
aut dato ad cogitandum spacio, aut domi sunt scri-
ptæ. Prima illa duo expeditam promptamq; requi-
runt memoriam: postremum etiam ex scripto po-
terit recitari, quam consuetudinem non possum im-
probare. si non solum pronunciet adolescens quæ
scripsit, sed etiam quam uiam sequutus sit indicet.
Hoc enim modo & plus utilitatis auditoribus ad-
fertur & ipse qui recitabit maiorem ad scribendum
diligentiam & curam est adhibiturus. Poematum
etiam & carminum festiuorum, & concinnorum et
argutorum lectiones admitto: est enim liberalis ex-
ercitatio

Triples
declamā-
tio.

exercitatio, & magnas utilitates adfert etiam in orationem. Hæc de declamandi, scribendiq; consuetudine, sine qua exercitatione nihil præclarum in literis effici potest. Sed uidendum est ne in disputando loquaces, & in scriptura tumidi & inanes & impuri & negligentes simus. In disceptando subtilitas, & acumen, & in stilo uis & ornatus & elegantia & diligentia laudari solet. Scribere quàm plurimum, & disputare quàm sæpißime oportet: neq; prolixitate diligentiam, sed ornatu & acumine æstimamus. Quod concinnum est, etiam si breue sit, tamen laudem industriæ habet: quod uero inconditum & mendosum quantumuis prolixum sit, cadit in uituperationem. Est autem in omnibus argumentorum habendaratio. ut ea seligamus, quæ subtilitatem, acumen, ornatumq; capiant. qua in re illud uidendum est, ne quod proponimus nobis sit ignotum. quod enim ignoramus, neq; elegantia conuenienti neq; ingenio subtili potest esse locus. Notum igitur sit quod tractare uolumus, & capax omnium quæ studemus affingere.

De concordia & modestia, & diligentia professorum.

IN his rebus & in cæteris omnibus studiis, discipulorum industriam alere debet magistrorum diligentia

DE L I T E R A R V M L V D I S

gentia. Et quanq̃ diligentia inprimis in doctoribus spectanda est, tamen concordia atq; modestia maxime præceptores decet. Offensiones enim turbulenta & spiritus effrenati, ab auaricia plerunq; & ambitione oriuntur: quorum alterum impium, alterum illiberale, utrumq; semper indignum magnis ingenijs fuit. Sæpe turbare studia solet inuidia, & nulla re magis religio quàm ambitione uiciatur: & in quocunq; illa duo sunt, nullus ibi locus est charitatis. Vt autem ipsarum artiũ atq; doctrinarum, quarum professio in ludo suscipitur, sempiterna consensio, & firmissimum uinculum est: ita etiam necessitudine coniungi harum doctores decet, ut similia sint in tali quasi collegio studia, eadem consilia & consentientes uoluntates. Qui inuidia torquentur, & iactantur ambitione, in illis nihil fidum, nihil perfectum, nihil quod cuiusquam uirtutem possit oblectare, Et si quibus unq̃ temporibus religio magna exempla desiderauit, nostra maxime desiderant, in tanta potentia & copia aduersariorum. Ferendæ igitur in illis locis offensiones non sunt: ubi seuerior instituitur disciplina, quæ ad omnes homines pulcherrimas quasi demanantes commoditates habet. Plerunq; enim ut regum uoluntatem & cultũ, cæterorum nobilitum habitus, sic discipulorum studia, magistrorum rationes, etiam ineptissimas imitantur:

tantur: Itaq; non doctrinā ad posteros uiciosi transmittunt, sed uiciorum stirpem radices agere sinunt, atq; in sempiternum, quantum in ipsis est propagant. Consensus igitur sit studiorum & laborum, & communicatæ uoluntates, & distributæ operæ. Illud etiam elaborandum est, ut non solum ea tenemus, que nos docere oportet: uerum etiam cætera cognoscamus quo ad possumus, quæ à reliquis, uel qui infra, uel qui supra nos sunt, traduntur. Nam & quæ ante didicerunt pueri, ea in superioribus locis sunt etiam retinenda. & quæ in manibus sunt, insequentibus sunt accommodanda. Præsentia doceri, præterita renouari, & futura prædici debent, hæc enim plurimum ad excitandum, custodiendum, erudiendū ualent. Versatur autē omne docentis officiū in docendo, corrigēdo, cohortādo, dehortando, quæ omnia dissensione perturbantur. Sed sunt quædam necessaria concertationum genera, ut puericiæ, & ueritatis. Errores enim ex hominibus tollendi sunt, & contra inscientiā doctrina, et contra uiciū uirtus est defendenda. Sed abesse debet ab omni inquisitione ueritatis animi perturbatio. Itaq; recte à philosophis Socrates laudatus est, cuius suauissimus sermo ita cū Sophistis instituitur, ut ueritatis studiū susceptū esse uideatur: et maximus lepos, atq; humanitas appareat cū docet, cū emendat; cū cōtra sentit, cū ridet: sine

Docentis
officiū.

DE LITERARVM LVDIS

contumelia, sine ira, sine scurrilitate, ut uicia uitasse, homines uero non odisse uideatur. In pueris etiam & adolescentulis honestæ contentiones excitantur, alitur enim his illorum industria, & frenari moderariq; possunt à præceptoribus tum cum præter modum exardescunt. Non uituperandum est, si uinci turpe, & doctrina excellere gloriosum esse existiment. Turpe enim est nunq̃ excitari & semper ignauia inertiaeq; condemnari. Deinde non maneant in puerili ætate affectus, imò summæ amicitiae ex talibus contentionibus efflorescunt. Vt enim causarum aduersarij, maximiq; patroni, cum orant grauitè contendunt & uociferantur, ubi uero peroratum et iudicatum est, reconciliantur: sic etiam post puerilia hæc dissidia, quæ literarum doctores moderantur, summa plerunq; inter grandiores existit charitas & beneuolentia. Sed magistrorum studia magis quam concertationes exerceri decet, & si quæ contentiones esse debebunt, quod fateor: sint illa comitatis, humanitatis, charitatis, non asperitatis, non crudelitatis, non odij: & talis in literarum gymnasio conuictus, qualem poëtæ in Helicone & Parnassio musarum esse fingunt, summa cum concordia, ut uocum, numerorum, instrumentorum, sic uiæ, studiorum, atq; uoluntatum. Percurri breuiter, quæ de puerili educatione, & de aperiendis literarum ludis in

*dis in presenti præcipi poterant: & uiam quandam
si non patefeci, at commonstrauī saltem iter,
in quod si intremus, facilius ea quæ
maxima sunt, consequamur.*

FINIS.

ARGENTORATI APVD

VVendelinum Ribelium. Mense Martio

Anno. M D XXXIX.

Ex concilio Gabalionensi. capite tertio.

De scholis Canonorum instruendis.

Oportet etiā ut sicut Dñs Imperator Karolus uir singularis māsuetudinis, fortitudinis, prudentiæ, iustitiæ, temperantiæ, præcepit scholas constituent, in quibus & literalis solertia disciplinæ, & sacræ scripturæ documenta discant, & tales ibi erudiant, quibus merito dicatur à Deo. Vos estis sal terræ, & qui condimentum plebibus esse ualeant, & quorum doctrina non solum diuersis hæresibus, uerum etiam Antichristi monitis, & ipsi Antichristo resistāt, ut merito de illis in laude Ecclesiæ dicatur. Mille clypei pendent ex ea omnis armatura fortiū.

Ex concilio Toletano. xvi.

De conuersatione Clericorum in uno conclau.

PRona est omnis ætas ab adolescentia in malū. Nihil enim incertius quàm uita adolescentium. Ob hoc constituendū oportuit, ut si qui in Clero pueri, aut adolescentes existunt, omnes in uno Cōclau atrij cōmorentur, ut lubricæ ætatis annos nō in luxuria, sed in disciplinis ecclesiasticis agant: deputati

putati probatissimo seniori : quem & magistrum
doctrinae, & testem uitae habeant. Quod si aliqui ex
his pupilli existant sacerdotali tutela foueant, ut &
uita eorum à criminibus intacta sit, & res ab in-
iuria improborum. Qui autem his præcep-
tis resultauerint monasterijs deputentur, ut
uagantes animi & superbi, seueriori
regula distringantur.

D. Nicolaus Gerbelius
ad lectorem.

Quis Cereris dotes, quis dulcia munera Bacchi,
Quisue Olei nosset gratia quanta foret?
Alma Ceres fruges, blandus ni uina Lyceus,
Monstrasset, latices docta Minerua suos.
Sic foret & ratio studiorum immersa tenebris,
Sturmius hanc medica ni reparasset ope.

Ioan. Sapidus Selestadien.
ad lectorem.

Si te tangit amor conatus lector honesti,
Et cupis humanas res sapienter agi:
Non potes Argentorati non totus amare,
Digna & conscriptos tollere laude patres,
Quod satagunt summo docilem molimine pubem
Formari rectis instituiq; modis.
Tu studijs gratare bonis, uotoq; fideli
Opta principio numina dextra pio.









DE INGENVIS
SCHOLASTICORVM
moribus

SIMONIS VERREPAEI LIBELLVS.

Primæ puerorum institutioni non
vtilis tantum, sed etiam val-
de necessarius.



ANTVERPIÆ
Apud Ioannem Bellerum
ad insigne Aquilæ aureæ.

1582.



Ornatiss. Humanissimóq; viro M. PAVLO
 HVBENIO ad D. Dionysij apud Leo-
 dienses Canonico & Scholastico, Simon
 Verrepaus. S. P. D.



*I*N puerilibus litterarum ludis
 aperiēdis, id plurimū conferre,
 tum ad mores rectē formandos,
 tum ad pietatis & litterarum
 studium quod id deceat modo pro-
 bē instituendum, multa nos docuit, (quæ
 rerum magistra esse dicitur) experientia, si
 Scholasticæ Iuuetuti, quæ ad otia & omnē vi-
 tæ licentiam, multò pronior est, quā ad vllos
 labores, & honestatis studia, certæ quædam
 præscribantur rectē viuēdi studēdique leges,
 quibus tamquam præsentī fidelīq; pædagogia
 quadam insolentes peruicaces & præfracti à
 malefactis coerceantur: probi verò morigeriq;
 in melioris vitæ disciplinæ earum monitu con-
 tineantur; Hoc certè cum dudum animaduer-
 terem, & huiusmodi leges apud varios con-
 quisitas, non nullas tandem inuenissem, nec in

omnibus tamen optatis ille nostris responderent, desumptis hinc inde nonnullis, adieci
 his ipse, quæ deesse desiderariq; videbantur,
 congestisque Libellum hunc breuem & pusil-
 lum, sed tamen qui longè maxima vtilitate,
 breuitatem facile compensauerit, Immo quem
 omnino breuem esse conuenit, vt a paruulis
 possit & sæpius euolui, & fideli memoria fa-
 cilius contineri; qui si iisdem proponatur,
 eiusque præscriptæ leges à primis studiorum
 annis accuratè quotidie inculcètur, quantum
 hinc ijdem commoditatis compendijque ad ma-
 iores litterarum virtutumque progressus sta-
 tim faciendos, accepturi sint, cum id verbis
 consequi non facile sanè queam, nolim ea in re
 calamum nostrum fatigare, sed quicumque
 eius ad pauculos menses periculum fecerit,
 nullā is huius probationem à me requisierit.

Hic igitur cum a nonnullis ad editionem
 iam euocaretur, ne temello & paruulo deesset
 Patronus, nō immeritò eum tibi ornatissime
 D. Scholastice, quantumuis exiguum offe-
 rendum

rendum esse existimaui, quod scilicet decere
 id crederem, ut quod in puerilium Scholarum
 vsum foret elucubratum, id illi offerretur, cui
 per probos, diligentes, & eruditos Instituto-
 res, scholas rectè aperiendi cura & officium
 commissum esset: Accedit huc, quod ea sit
 tua, tuorumque propinquorum in me beneuo-
 lentia & humanitas, mihi iam inde perspecta,
 cum primum ex Brabantia in Leodiensem
 hanc terram profugiens, à Theodoro Cryæro
 affine tuo, singularis in me humanitatis viro,
 tum paulò post abs te quoque Leodij exceptus
 sic essem, ut vobis iam non alienus, sed aut
 frater, aut sanguine coniunctissimus videri
 potuerim; Quo certè nomine, à me vobis vicis-
 sim omnia humanitatis & gratitudinis officia
 deberi libentissimè agnosco.

Sed quid ego hæc cōmemorem? cum in isto
 horrendo Belgij incendio, Bredæ Lossensiū in
 ædibus tuis, apud hunc tuum adhuc agam af-
 finē, et in ipsius, aut verius tua, hæc cūdantur
 officina, an alium me deceat quærere huius

Scripti patronum, quam eum, cui & ex officio
Scholastico, & hospitij iure, hoc quidquid est
operis debeatur? Si gratitudinis id lege pro-
hibetur, nolim alias afferre, cur id faciam,
rationes, sed te potius rogatum velim magni-
fice D. Scholastice, vt quod in Scholarũ vsum
tuis ex ædibus ad te mittitur, in gratam tuo-
rum in me beneficiorum memoriam libenter
benignèque suscipias, & in eo non tã muneris
quantitatem, quàm animum expendas offe-
rentis; Vale felix & faustus humanissime &
integerrime Domine; Tuis ex ædibus & solo
natali Breda Comitatus Lossensis, & Eburo-
num ciuitate non ignobili, Anno virginiei
partus . CIO IO LXXXII. IIII. Ka-
lendas Maias.

De

*De Scholaſticarum legum vtilitate
ad Lectorem præſatio.*

QUod in Politicis ſcribit, amice lector, Peripateticæ ſcholæ princeps Ariſtoteles, *non facile permanere ciuitatem, quæ non ſit legibus & conſuetudinibus conſtituta*, Idem de litterarijs iſtis puerorum ludis verè licuerit affirmare, cum enim rudis puerorum ætas, ſit ad vitia, quàm ad virtutes multò propenſior, otiumq; labori, & luſum ſtudijs non pauci eorum ſic anteponant, vt niſi continua Præceptoris præſentia & monitione crebra ad ſtudiorum labores capeſſendos vix vnquam queant excitari.

At cum Præceptores, quantumvis id magnopere fortasſe cupiant, domi foriſq; in numeroſo præſertim grege, non ſemper præſto ſuis eſſe queant, inennda fuit ratio aliqua, qua Præceptores abſentes hoc officium vtcunque penſare queant, qua nulla à me potuit accommodatior inueniri, quàm ſi Præceptoris loco adhibeantur diſcipulis certæ & præſcriptæ viuendi ſtudentiſque leges, quorum monitu rigore ac metu, quaſi ſeuera quadam pædagogia in ſtudijs & officijs contineantur: Inſolentes, peruicaces, & præſracti à malefactis arceantur, probi verò & morigeri

in bona & laudabili Disciplina adminiculo legum viuere perseuerent, & alacrius ad honesta contendant.

Hanc verò sanctarum legum paedagogiam tenellæ adhuc ætati esse necessariam, Cœnobarum & Canonicorū constitutiones, Regū præterea & Principū decreta facile cuius cōprobarint, quæ, quo accuratius obseruātur, hoc magis viget in ipsis pietas, viget vera & orthodoxa Religio, viget honesti studiū & ōnis politica disciplina.

Quid igitur non idem efficiat, vtilium legum constitutio, inter paruulos & rudes etiamnum politiorum litterarum tirunculos, qui, quid æquum, aut iniquū, quid honestum sit aut inhonestum, quid eos facere, quid vel omittere oporteat, nisi id Lege, vel alio monentē, per ætatem intelligere, omnino nequeunt? His igitur præscripta Lex, doctoris & paedagogi loco fuerit, reuocans eos à vitijs, & ad virtutes impellens.

Quod certè efficacius præstabit, si quæ sui sunt muneris, exequantur sedulò Præceptores, ut nimirum Leges huiusmodi planè & apertè discipulis suis exponant, quidq; singularum legum obseruatio, ad litterarū vel pietatis studium conferat, ex ijs locis quos in Scholijs in hunc vsum adiectis, indicauimus, discipulis commōstrarint, & quo-

& quotidie, vel altero quoque die vnius tabulæ Leges toti gregi prælegantur, vt hac crebra repetitione altius eorum mentibus inferantur.

Illud tamen aduertendum hoc loco, non esse has omnes scholis omnibus conuenientes, sed alijs alias plures aut pauciores esse præscribendas, pro loco, tempore, numero, ætate, moribus, eruditione, alijsq; puerorum qualitatibus, ne fortasse vel superuacaneæ præscribantur, aut necessaria omittantur.

Addam postremò, cuiusque Legis præuaricatoribus pro delicti qualitate statuendam esse certam aliquam à Præceptoribus multā, quæ Sabbathi quoque die ab ijsdem deleatur.

Nos qui complusculos annos Scholasticū hoc saxum voluimus, re ipsa comperimus huiusmodi Legum observationem, ad probatam puerorum institutionem tantum afferre adiumentum, adeoque esse necessariam, vt, quod initio dixi, repetere nō verear, quod Aristoteles de Ciuitatibus dixit, *Scholas non facile permanere, quæ legibus non sunt constitutæ.*

BARTOLOMEVS HONORIVS
P. H. in Scholasticatum Legum com-
mendationem.

Viderat è ludo pueros prodire solutis
Moribus, exculto pectore Diogenes.
Non illos baculo cadendos esse putauit,
Sed Praeceptorem protinus aggrediens:
Infelix Doctor, quare sic instruis, inquit,
Hac tibi, non pueris, culpa luenda venit.
Dixit, & insulsum nodoso fuste Magistrum
Percussit toto conspiciente foro.
Si nunc ad vitam Sophus hic à morte rediret,
Quodq; Simon condis forte videret opus,
Diceret, hic nobis vigilando restituit rem:
Legibus his vii, laudicysq; innat.

Helmontij Kalend. Augusti.

AD

H

A D I V V E N T V T E M
Latinae linguae candidatam.

S. V.

Huc huc ô Latia linguae studiosa Iuuentus
Huc huc ades dum, te volo.
Ecce tibi offertur, donum ingens, iste libellus,
Non mole magnitudinis,
Ast argumenti magna ipsius utilitate,
Verè aestimandus plurimi:
Quippe docet studiis puros adiungere mores,
Bene dicere, & bene vivere.
Qua nisi iungantur, Musas ut moribus ornes,
Ornesq; mores litteris,
Nil agis in studiis, labor est sed inutilis omnis,
Et vanitate vanior.
Immo quid hoc celem? cur rem non eloquar omnem
Quae veritate verior?
Si Musae ingenuis iungantur moribus, ipsam
Parant perennem gloriam.

LEGES

LEGES DVODECIM

TABVLARVM.

Leges	Pietatis.	Tabula 1.
	Templi.	Tab. 2.
	Chori.	Tab. 3.
	Scholæ	Tab. 4.
	Domus	Tab. 5.
	Cubiculi	Tab. 6.
	Plateæ	Tab. 7.
	Lusus	Tab. 8.
	Erga præceptores	Tab. 9.
	In hominum congressu	Tab. 10.
	In habitu corporis	Tab. 11.
	In mensa & conuiujs	Tab. 12.

DE

DE INGENVIS
SCHOLASTICORVM
MORIBVS
Libellus.

XII moralium Legum tabulis breuiter, &
perspicuè explicatus.

TABVLA I.
*Leges spectantes ad Pietatem
De Deo, & Sanctis.*



EV Min primis studiosè & piè colito.
Ipsū pra omnibus diligitō semper, & timeto.
Litterarū studia sine Religione vana existi-
mato.

Omnia bona à sola Dei benignitate provenire credito.

*Ad pulsū igitur cāpane matutinū, meridianū & vespertinū
flexis humi genibus ipsi pro beneficys gratias agito.*

Erga { *Sanctam virginem Deiparam Mariam,
Angelos, omnesque Sanctos, & eorum reliquias,
Sanctam Matrem Ecclesiam, eiusque ministros
singularem deuotionis affectum semper habeo.*

*De sanctorum vita, & actis libenter, crebrò, animòque at-
tento, vel legito quidpiam, vel audito,*

*De iisdem sic sentio ac loquitor, tamquā diuinitati proxi-
mis & coniunctis.*

De festis diebus celebrandis

*Dominicis ac festis diebus ethnicorum libros seponito.
 Eòsque his potius exercitijs transigendos memento.
 Primum cur dies illi sint instituti tecum perpendito.
 Pys ante omnia tum vacato precibus.
 Vitæq; & passionis Christi meditationi.
 Legendis quoq; pys Sanctorum Historijs.
 Aut alijs sanctorum Patrum elucubrationibus.
 Verbum Dei diligenter tum legito, tum audito.
 In primis verò sacrificio Missæ, quo decet modo, tū interesto.
 Sermo tum sit potissimum de rebus pys, utilibus & honestis.
 Ita loquitor, ut de verbis otiosis apud Deum facile reddas
 rationem.*

De confessione & Eucharistiæ, sumptione.

*Peccata tua celebrioribus festis D. Salvatoris
 Et festis omnibus beata Virginis Dei paræ,
 Aut singulis potius totius anni mensibus, post factam dili-
 gentem conscientie discussionem Sacerdoti confiteor.
 Qui etatis fuerint maturioris, iisdem diebus, si modo probe-
 tur id Confessario, sacrâ Eucharistiâ pie & digne sumito.
 Ditiores tenuioris fortune studiosos, elemosynis, si queant,
 adiuvanto.*

De cauendis obtrectionibus, mendacijs &c.

*Nulli hominum obtretrato, nec inimico quidem.
 Neminem unquam probroso nomine appellato.
 Sanna vel corporis gestu nullum irrideto.
 Nec alicuiquam naturale vitium exprobrato.
 Contentiones, contumelias, & pugnas, omnemq; insolentiam
 quovis loco & tempore fugito.
 Nulli prorsus verbo aut facto quamcūq; iniuriam inferto.
 Discor-*

*Discordiarū auctores, quique vim alicui intētarint, pro noxa
pœnam luunt, aut e cœtu scholastico eijciuntor.*

Ab omni mendacio semper abstinere memento.

Nullus alteri, Tu mentiris vel fingis, unquam dicito.

Insurandum, seu verum, seu falsum dicendo, ne usurpato.

Nullus alterum, num quid ausit iurare, interrogato.

Testimonium aduersus delinquentem nemini negato.

De omni cauenda obscenitate.

Turpiloquium & fornicationem ne ullā quidem nominato.

Nec aures tuas unquam obscenè dictis præbeto.

Vernacula aut obscena carmina, nec canito, nec legito.

*A libris quoque spurcis, tum Hæreticorum, aut suspecti no-
minis auctorum,*

*Ab inutilibus adhuc, aut lingua vernacula conscriptis sem-
per abstineo.*

*Nec domi, nec foris, picturam habeto parum honestam,
vel decoram.*

Nec fortè usquā oblatā intentis in eam oculis cōtemplator.

*Prævaricatores Legum huius primæ Tabulæ quilibet ad-
monere memor esto.*

*Qui ne tum quidem sese emendarint, aut pœnam luunt,
aut scholis ipsis excluduntor.*

TABVLA II.

Leges ad Templum pertinentes.

De accessu ad Templum.

<i>Accessurus ad Templum</i>	{	<i>Libellum piarum precum</i>
<i>ad manum habeto.</i>		<i>vel</i>
		<i>Sphæulas certè precatórias.</i>

Cœmi-

Cœmeterium transiens oratio hoc modo cum Ecclesia: Anima fidelium defunctorum per piam Misericordiam Dei requiescant in pace.

Templum ingrediens orationem sequentem legere memento: Aufer à me quæso misericordissime Deus, &c.

Templo conueniunt	{	<i>Quies & silentium.</i>
		<i>Peccatorum coram Deo confessio.</i>
		<i>Missarum deuota auditio.</i>
		<i>Oratio cum attentione animi.</i>
		<i>Pia lectio & meditatio.</i>

De Quietē & Silentio.

A fabulis, risu, lusu, somno, discursu, omniq̃ lascinia in Templo quilibet abstinet.

Vanas & inutiles cogitationes, illinc abs te propellito.

Strepitus, clamores, aut inciuiles ibi gestus edere, nefas est.

Incidere sedilia, & parietes depingere nullus audeo.

Quilibet se frustra adiisse Templum existimet, qui non inde domum melior puriorq̃ redierit.

De peccatorum Confessione.

Ingressus Templū sacri gratia in loco precibus accommodato te humi prosteruito.

Oraturus Deum nullus muro, sedi, vel scamno (nisi infirmitas aliqua id impediat) innititur.

Peccata, quibus Deū offenderis, in memoriā tuā reuocato,

Generalī coram Deo Confessione cum animi contritione agnoscito.

Peccatorum omnium Remissionem supplex his verbis à Deo petito, Deus propitius esto mihi peccatori. Deinde, Misereatur nostri omnipotens Deus, & dimissis omnibus peccatis nostris perducatur nos ad uitam æternam, Amen.

De Missa, & pñs sub eadem preci-
bus & meditationibus.

Sacerdoti rem sacram peracturo, si fortè ministro destitua-
tur, reuerenter, sedulo & officiosè ministrato in
summa quiete & silentio.

Quilibet sub Missæ sacrificio Orationi, Lectioni vel pia Me-
ditationi attentè, & reuerenter vacato.

Deum quisque quotidie rogato, ut se dirigat ad eum vite
statum, qui & ipsi Deo gratissimus sit, & salutis suæ
maximè salutaris.

Preces Scholasticæ secundi, aut tertij capitis.

De æterna Dei Sapientia

De Sancta Cruce

Precationes } Septem Psalmi cum Litanys

Liturgicæ } Hora de beata Virgine

Officium defunctorum

Aut preces que Rosaria vel Corona dicuntur.

Passionem & Mortem D. Seruatoris in memoriam tum
maximè reuocato.

De quibusdam sub Missa Cæremonijs.

Ad Euangelij Lectionem assurgito, & religiosè compli-
catis manibus, si propius adsistas, auscultato.

Ad nomen IESV reuerenter genu flectito.

Cū legitur in Symbolo, & homo factus est, in genua pro-
cumbito, submitteus te in illius honorem quicum Deus
esset, ut nos quoque Deos faceret, dignatus est homo fieri.

Ad Elevationem Corporis Domini, utroque demisso genu
humis sedeto.

Ad altare sit versa facies, & ad Christum, quem intueris
animus.

Christum Deum & hominem ibi verè præsentem cum

Ecclesia Catholica supplex adorato.

De sacris Concionibus.

Concionibus sacris suo loco & tempore, cum magna reuerentia arrectis auribus interesse.

Concionantis memoriam fabulis aut strepitu nemo disturbato.

Sine Præceptoris consensu nullus se è templo subducito.

Reuersus quisque in Scholā magistro reposcenti totius Concionis summam, vel aliquot sententias, aut ceriè alicuius loci explicationem referre satagito.

Transeunti Templum quid agendum.

Templum vel obiter transiens, Christum illic verè præsentem, precatiuncula breui flexis poplitibus salutato.

Si quo in loco Missa fiat, vel S. Eucharistia aut baptismi Sacramentum administretur, aduersa facie flexoque genu honorem exhibeto.

In camiterijs, aut locis quibuscunque consecratis, nec ludito, nec ad aliquod naturæ opus illuc concedito.

Quid agendum sit Templum prætereunti.

Prætereens vel fores Templi, vel locum in quo venerabile corpus Domini adseruatur, eo tum conuerso vultu, nudato capite, ac flexis genibus, precatatione breui Christum salutato.

Effigiem Christi Sernatoris, sanctæ Crucis, aut beatæ Virginis, seu in vijs, seu in alijs quibuscunque locis prætereens reiecto capite honorato, memor semper illius tum distichi in Concilio Nicæno euulgati.

Hanc videas, sed mente colas quod cernis in ipsa:

Nam Deus est, quod imago docet, sed non Deus ipsa.

TABV.

TABVLA III.

Leges Chorum frequentantium.

De Ingressu & Egressu.

IN Chorum, vel è Choro precipitanter ne prorumpas; sed sine fabulis & mutuis compressionibus, religiosè ac lenitè cum adiuncto socio progreditor.

Chorum vel Templum auditurus Sacrum, Matutinas aut Vesperas absque libello Precum, vel Sphæculis precatorijs, nullus, ut diximus, ingreditur.

In Choro quid obseruandum.

In choro decenter & compositè versator, & pios ubi queritus usurpato.

In utroque chori latere Corycai seu Delatores, venientes serò & insolentes obseruent ac notent.

Dum itur ad Missam, vel sacram Concionem, & in supplicationibus Ecclesiasticis, ydem illi, clamantes, garrientes, aut extra ordinem aborrantès notent ac prodant.

De Ecclesiastico Cantu.

Sabbatho, & pridie dierum festorum Responsorijs Antiphonis, & Versiculis, & id genus alijs cantandis, ne quid erres studiosè caneto.

Ecclesiasticis Cantionibus designatus libellũ habeto ea continentem, quæ in Templo canenda sunt.

De Ecclesiasticis supplicationibus.

In supplicationibus omnes bini, ordine, & verecundè absque fabulis, risu, & strepitu capite nudato accedunt.

Quique non canunt, vel continuis ibi precibus vacanto, aut quidpiam salutaris doctrinæ legunt aut meditantor.

LEGES SCHOLASTICÆ
TABVLA IIII.

Leges Scholasticæ.

De Ingressu.

Scholā tempestiuè & modestè absque indecora cursitatione, mutuâque compressione introito, & exito.

Qui post horam venerit constitutam, modo & ratione bona pœnam luit, nisi fortè probabilem, à parentibus aut heris excusationem attulerit.

Ingressus Scholam euestigio se quisque sua adiungito tribui, extra quam nullus unquam sedeto.

Quid agendum ante Præceptoris ingressum.

Absente adhuc ante horam, aut euocato Præceptore, nihil turbatum, aut clamoris moueto.

Sed libro statim explicato Lectionem in Præceptoris aduentum diligenter prouideito.

Præfecti singularum trium ante horam in Schola inter primos semper assumto.

Et singulorum arma Scholastica, libros, chartam, atramentarium, cum theca pennaria, & tribus in ea pen- nis inspiciunto.

Ediscenda, declinanda, comparanda, coniuganda, aliæque classis cuiusque exercitia præscribunto & exigunto.

De Corycæiseu Delatoris officio.

Corycai absentes & serò venientes omnes diligenter obseruanto.

In Catalogo recitando neminem prorsus prætereunto.

Ad nullius nequitiam, turpitudinem, insolentiam aut desidiam conuiuent.

Contra verò innoxium, aut ex odio neminem notanto.

Munc-

*Muneribus denique ne corrumpantur; aut terreantur
cuiusquam minis cauento.* (tunto.

*Nihil postremò quod ad suum spectat officium prætermittit.
Quidquid per totam septimanam à quoquam peccatum est,
hora quarta diei Sabbathi tradatur in schedula descriptum Præceptori.*

Hic verò pro delictorum ratione, nunc admonendo, aut obiurgando: nunc ferula aut virga singulorum multas deleto; rarius notatos meritis laudibus euehito.

Corycaus quoque qui in animaduertiendo, & accusando officium suum neglexerit, à magistro castigator.

De absentibus & ingredientibus serò.

Nunquam nisi urgentibus negocijs valde necessarijs à Schola quisquam abesto.

Abfuturus à Schola facultatem petat à Scholarcha.

Ad hunc si fortasse non detur accessus, post ad ludum reuersus adducat fide dignum, per quem queat excusari.

Aut certè ratum remissionis chirographum Præceptori aut Scholarchæ exhibeto.

Serò in Scholam venientes, absente forte Gymnasiarcha, nisi probe se excusarint, ferula cadunt à Præceptore.

De Humanitatis officio exhibendo.

Discipuli Præceptorem venientem reuerenter excipiunt.

Abeuntem quoque honore eundem prosequuntur.

Præsentè Magistro vniuersa inuentus consilescat: eodem absente ne perstrepat.

Ingredientè forte Scholam viro quopiam honorato, altissimum tunc esto ab omnibus silentium.

De precibus & armis Scholasticis.

Matutinis & Vespertinis Scholæ precibus tēpestinè quilibet interesto.

Quisque cum Silentio, Attentione, & Reuerentia Preces cum ceteris legito.

Ferulas aut virgas tamquam res sacras ne digito quidem attingendas memento.

Cultrum omnino nullum gestato, sed pennas quisque suas priusquam in Scholam prodeat aptato domi.

Parietes carbone vel creta ne depingito.

Nomen quisque suum librorum capitibus inscribito.

De omni cauenda insolentia.

Nemini umquam pede, cubitione, aut ulla re alia negotium faceßito.

Qui alium pulsauerit sine iure siue iniuria, is graui pœne obnoxius esto.

Susurrationibus aut colloquijs Præceptorem docentem ne perturbes caueto.

Sibulum, clamorem, cachinnum, simulatam tussim, sonoram eruclationem usurpare ne assueßcito.

De Lëctionibus.

Præceptorem lëctionem enarrantem attentissimè auscultato.

A Præceptore dictata studiosè & emendatè excipito.

*Quæ forte per absentiam omiße sunt, intra proximum bi-
duum instauranda curato.*

Sub prælëctionibus nec cubitum libro, nec caput manu sustentato.

Nec ad omnem strepitum, vocem, sibilum, circumspectito.

In recitanda lëctione singula clarè, distinctè, seruatisq; punctis pronuntiato.

Ter nullus lëctionem suam recitans impunè errato.

Lëctionis ignarus, librum, dum recitas, ne inspécito.

Reddenti memoriter lëctionem, nihil unquam suggerito.

De

De exercitatione styli.

Epistolas, Carmina, & quæcunque ad styli exercitium instituta sunt, suo tempore exhibeo.

In iisdem componendis multum operæ, industriæq; ponito.

Eademq; frequenter examinato & relegito.

Et postremò scitè & eleganter eadem pingito.

De Disputatione.

In Disputationibus ferox adsit & modestia,

Absit vero clamor, contentio, ira & immodestia.

Veritati quisque humiliter & amicè cedat, omnemque litteram Præceptoris iudiciū dirimat.

Disputando in sua tribu victi, præter notam, primam in certamine proximo questionem proponunto.

Loquendum Latine.

Latine cum iis qui intelligunt, & in Schola, & extra Scholam, etiam in lusu omnes loquuntor.

In Grammaticorum Regulas, ne quid inter loquendum peccetur, sedulo caueto.

Nihil eorum quæ geruntur in Scholis, eliminandum.

Nihil eorum, quæ in Schola, vel intra parietes domesticos facta aut dicta sunt, foras efferunto.

T A B V L A. V.

Leges Domestice.

De Contubernijs.

OMnes tam Aduene quam Indigenæ eandem domū incolentes, in certa contubernia redigantur, quorum quodlibet octo vel decem contubernales comprehendat.

Si qui soli aut segregatim habitent, contubernio proximo se adiungunt.

Inter contubernales nullus alteri molestus esto, insolens nullus, aut petulans;

Nullus factiosus, aut in alios maledicus, sed omnes modesti, ac pacifici.

De Contuberniorum præfectis, seu Decurionibus.

Singulis Contuberniis præfectus seu præses constituatur, qui ceteros cum litteris, tum moribus antecellat.

Aut si ita videbitur Gymnasiarchæ, officium hoc per hebdomades ordine quasi in orbem eat.

Præfectus iste sit immunis à locario, quod vocant, & operibus domesticis.

Præfecto Contubernales omnes non minus pareant quàm Magistro suo, vel Scholarchæ.

Hic singulis hebdomadibus Gymnasiarchæ vel Præceptori omnium domi actorum rationem reddat.

Hic nec ullū iniuste nolet, nec peccantē accusare dissimulet.

Penes Præfectum hunc partes sunt alios mane à somno excitandi.

Adhuc in vijs, plateis, & area, in templo, cenaculo & cubiculo peccantes in aliquam domesticarum legum notandi,

Eosque in charta descriptos vesperi diei Sabbathi Magistro tradendi.

De peccantium multis.

Multa domesticarū legum minima sit unius nummuli. Maxima verò trium.

Quæ maiore digna sunt animadversione, pro delicti, tum qualitate, tum quantitate, à Præceptore vel Gymnasiarcha puniuntur.

Multa verò solvantur omnes in diem Sabbathi.

Pecuniola,

Pecuniola hinc collecta emuntur libri, vel alia, quibus donentur illi, qui ceteros notarum raritate superarunt.

De officio erga Parentes, aut Heros.

Parentibus & hospitibus suis quilibet mane felicem diem, vesperi faustam noctem, interdiu, è ludo reuersus, salutem precator.

Si quid illis præstandū sit obsequij, facilis ac libens id obito. Qui extra Collegium, aut ades Præceptoris parentibus conuiuunt, cum ijsdem humaniter agunt, ijsdemque honorem & obedientiam exhibent.

Domū absque Parētiū vel Heri sui permissu nullus egreditor. Nullus absque eorundem vel Gymnasiarchæ consensu foris pernoctato.

Nihil damni inferendum, &c. (caueto.

Suppellectili aut domui detrimentum vel minimū inferre Rem quamcunque alterius nec clam aufero, nec abscondito, nec loco suo dimoueto.

Rem verò alienā casu inuentam, cū primū possis, restituio. Nihil dando, emendo, vendendo aut permutando citra Rectoris, aut Parentum consensum, alienato.

De Pecunijs, Compotationibus, Armis, &c.

Pecuniam in vsus necessarios à Parentibus datam, pomis, nucibus, libis, aut similibus cupedijs ne insumito.

Compotationibus nec domi, nec foris interesto.

Ebrietatem, ut adolescentiæ indecoram, ita tum corpori, tum animæ valde noxiam, semper fugito.

Armis nullum prorsus vulnerato, aut petito.

Nec præter escarium cultiū, armorū quidquā domi habeto.

Non ficas aut piones, non gladios, malleos, aut globos ferreos.

Si quis armorum aliquid habuerit, id apud Præceptorem

vel hospitem suum seruandum deponito.

In area ne unquam ludito, aut diuagator, aut in latebris fabulâ misceto.

De Societate deligenda.

Illud ad parandam Virtutem & Eruditionem plurimum conferre credito, ut Discipulos doctiores & modestiores humanitate & obsequio tibi deuincias.

Adhuc ut cum Studiis & Eruditis assiduam habeas consuetudinem; Prætorum consortium, ut pestem, deuites, Et si ceteris sis præferendus, præfero te tamen nemini.

De Caritate erga Proximum quemque.

Nulli hominum verbo factiône inferto iniuriam vel contumeliam.

Hunc Caritatis affectum erga proximum non minuat Natio, Ciuitas, aut Cognatio.

Non possessio, conditio, aut ingenium; cū unus sit Pater omnium Deus, quem docti à Christo quotidie Patrem appellamus, qui nullum agnoscit filium, qui ipsius filios non agnouerit fratres.

TABULA VI. Leges Cubiculi.

Tria in Cubiculis sunt	Agenda	Orandum,
		Dormiendum, Studendum.
	Seruanda	Verecundia.
		Quies.
		Silentium.

De Oratione & Somno,
seu modo vesperi incumbendi.

Prius-

Prinsquam vesperi cubitum eas, legito, vel audito quidpiam, quod memoria mandetur, dignum.

Flexis deinde ante lectum genibus, quæcunque die illo audieris, videris, aut egeris, in memoriam renocato.

Si quid honestè, prudenter, cum decore & laude dixeris vel egeris, Dei id esse munus, ipsique proinde agendas esse gratias memento.

Si quid turpiter, ineptè, aut vituperatione dignum, id ex tua profectum esse malitia, fateor, doleto, veniamque cum proposito te emendandi in posterum à Deo petito.

Preces Vespertinæ.

Has ordine deinde legito quisque Precationes,

Omnipotens semp. eterne Deus, &c.

Pater noster, Ave Maria, Credo in Deum, &c.

Obsecro te Angelice spiritus, &c.

Lectum ingrediens signo Crucis munitus hanc addito brethern precatiunculam:

In nomine Domini nostri Iesu, &c.

Nec pronus cubueris, nec supinus, sed primum innitens dextro lateri, brachysq; ita transuersim complicatis, ut pectus muniat figura Crucis.

Signo Crucis, & pia Numinis invocatione, sanctisq; cogitationibus, omnem Diaboli ditionem propellito.

Ingressus lectum nullus verbum proferto, sed in silentio orationem sequentem dicito:

Suscipe me tuendum Iesu Christe.

De obseruatione Verecundiæ.

In vestiendo, exuendoq; Verecūdiæ, quisq; rationem habeto. ut scilicet nullus umquam aliorum nudet oculis, quod mos & natura lectum esse voluerunt.

Deum

*Deum & Angelum tuicustodem, tibi ubique presentes,
semper reueretor.*

*Singuli soli, & in subucula seu indusio lineo dormiunt.
Somnus sumēdus tamquā medicina quadā curādo corpori.
Immodicus reddit corpora segnia, pigra, noxijsq; humoribus
redundantia.*

Septem, igitur, horis dormisse fat est iuueniq; seniq;.

Modus mane surgendi.

*Mane quilibet hora præscripta excitatus, intra unius
Miserere spacium è lecto surgito.*

Excitandi partes penes ipsum præfectū, uti diximus sunt.

*Mane surgens, vesperiq; lectum ingrediens, Frontem &
Pectus signo Crucis munire assuescito.*

Interius idem p̄ys precibus & meditationibus communito.

Precationes Matutinæ.

*Precationes, tum Matutinas, tum Vespertinas memoriter
quilibet teneto & recitato.*

Precatiuncula mane se primum erigentis.

In nomine Domini nostri Iesu, &c.

Precationes iam induti legenda flexis ante lectum genibus.

Tibi o sancte Pater omnipotens, &c.

Pater noster: Ave Maria: Credo in Deum, &c.

Ego sum Dominus Deus tuus, &c.

Exaudi me Trinitas sancta, &c.

*Quilibet intra horæ quadrantem se induerit, orauerit, lec-
tique stragula concinnarit. (proditto.*

*Post horæ quadrantem os & manus abluturus e cubiculo
Parentibus & hospitibus faustum quisque diem precator.*

De Munditia, Quiete & Silentio.

Quilibet rerum suarū munditiem, & concinnitatē curato.

Cubiculum

*Cubiculum quisque suum verrito, sordes asportato, omniaq;
in eo bellè disposita sunt.*

Lectos mane stratos nullus conturbato.

In cubiculo nec turbam, nec petulantiam cieto.

Ad vicini cubiculum sine causa nemo accedito.

Conuenticula in cubiculis ab omnibus vitantor.

Loquacitate, cantu, vel strepitu nullum obiturbato.

Cum nullo prorsus certamen, nisi de litteris, habeto.

Cubiculum nisi iusta de causa exire cauet.

De priuato in cubiculis studio.

Studiorum tuorum hunc statue scopum:

*Ut scientiam consecutus ad Dei honorem, tuamq; & proxi-
morum salutem eandem conuertas.*

*Cauendum in priuatis studijs, ne quis forte curiosus, ad res
veritas, inutiles, aut vanas cognoscendas incumbat.*

*Qui se ingenij acumine, & fideli memoria norint esse pradi-
tos, curent ut erga Deum grati sint.*

*Qui iisdem destituuntur, oratione, studio, & exercitio ea
consequi laborent.*

De vitando Otio.

*Otium ut tum studiorum, tum vitæ melioris certissimam
pestem, in cubiculis & lusu studiose semper euitato.*

Tempore nihil esse preciosius semper in mente retineto.

*Nulla dies abeat, in qua non legeris, audieris, vel scripseris
aliquid, quod eruditionem, vel virtutem augeat.*

*Adsit tamen studijs moderatio, cum ea persseuerantia, qua
corporis non ledat valetudinem.*

Nocturnas lucubrationes & intempestiua studia cauet.

Studijs Oratio præmittenda.

*Nec studia, nec aliud quid exorditor, nisi innocato prius ce-
lesti numine, vsus hac vel simili Precatione:*

Actiones

Actiones nostras quæsumus Domine.

Interim sic stude, quasi nihili sit ille auxilij laturus insigniter laboranti.

Lectiones in Schola auditas apud te, vel cum socio repetito.

Quæ ignorabis à doctioribus sciscitari nec pudeat nec pigeat.

Ad sonũ campanæ in Scholam euocantis, ut communibus intersis Scholæ precibus, præsentem te illic sistito.

Egrediens domo signo Crucis se quisque consignans dicitur:

Precor vos omnes sancti Angeli, &c.

T A B V L A V I I.

Leges obseruandæ in Plateis.

Egressis Schola quæ prohibita.

D*imissi è Schola confestim se omnes rectà domum rectè
piunt.*

*Incessus nec nimium sit lentus, nec nimium velox, nisi id
causa periculi, vel necessitatis exigat.*

Sit idem purus ac simplex, non affectatus.

Si quid in eo vitij natura dederit, industria tua corrigit.

Per forum, vicos aut angiportus nulli diuagantor.

*Nec in plateis cum alijs nugando, ludendo, spectandòue mo-
ram ullam faciunt.*

*In opificum officinis, aut usquam in sole apricantes ne assis-
tunt, vel confident.*

*Puerorum aut puellarum ludis, choreis, colloquijs aut con-
gressibus nullus se unquam miscet.*

*Gladiatorum, saltatorum, aleatorum, aut gameonũ ades,
pública diuersoria, aut loca suspecta, ne ingreditur.*

Luxis quoque discipulorum nullus vitior.

Collucta-

Colluctationes, inciviles aut indecoros gressus,

Item, curjus, clamores, cantiones, cachinnos,

Sonoram tussim, irrationes canum, aut morionum studiose omnes evitantio.

Fragmenta lapidum, nec in lectum, nec in domum, aut hortum cuiusquam iaciuntio.

Neminem prorsus dño, iniuria, vel contumelia afficiuntio.

Damnum alteri forte datum reſarcitio, & restituuntio.

De exhibenda Reuerentia.

Parentes, Præceptores, & Sacerdotes omni, & loco, & tempore reuerentor.

Sacerdotibus, Magistratui, & eiusdem vxoribus, viris item ac matronis etate venerandis via ciuilitate ceduntio.

Omnibus deniq; superioris alicuius dignitatis aperto capite alteroque flexo poplite, reuerentiam decēter exhibētio.

De Præſectorum officijs.

Quiſq; ad ſe via domum conferunt, à contubernij Præſecto obſervantor.

In legem aliquam delinquentes ad Præceptorem proximo in Scholam reditu deferuntor.

Aut Præſecti, delinquentium poena, ipſimeſ multantor.

T A B V L A V I I I.

Leges ſpectantes ad luſum.

De licito exercitationum modo.

COrporis exercitationes non ſint immodicæ, ſed aptæ rationi valetudinis.

In ijs ſe quilibet moderatè, & ingenuè, loco & tempore deputatis, exercetio.

In luſu

In lusu & animi remissionibus semper adsit aliqua memoria virtutis.

In iisdem & alias, cum suo quisque commilitone, Latine semper loquitur.

Quæ in Lusu cauenda.

*Absit in lusu, rixarum parens, omnis pernicacia,
Absit dolus omnis, & mendacium.*

Absit denique nequitia & omnis insolentia.

Nullus in ludo pecuniam deponat,

Aut aliud quod pecunia potest aestimari.

De ludis illicitis.

Lusus prohibiti	Illiberales, ut lusus	{	Alea.
			Charta.
	Coniuncti cum periculo.	{	Omnes fortune.
			Saltus.
			Lueta
			Iaculatio.
			Dimicatio.
			Pugna.
			Huc spectant
			AEstate natatio.
			Hyeme per glaciem cursitatio
			Nivis in alium proectio.

Ludos omnes illiberales, ut Alea, Charta, omnesque fortune ludos,

Aut cum ullo coniunctos periculo, ut Saltum, Lueta, Iaculationem, & alios id genus fugito.

Aestate Aquas, hyeme Glaciem, & Nivem cauto.

De alijs oblectamentis illicitis.

Piscationes, Venationes, Aucupia ne exerceto.

Cunicu-

*Cuniculos, Aves, vel alias bestiolas ne alito.
Nullius sepes, plantas, aut sementem corrumpio.
Nullius abigito pecora, aut fructus suffurator.
Nullus alterum in terram prosteruito.
Nullus fortè lapsum, ne surgat deincto.
Nullus humi iaceto, aut diutius confideto.*

TABULA IX.

Leges erga Præceptores.

Quid suis quisque debeat Præceptoribus.

PRæceptores, tum hospites, aut heros, amato, & honore
prosequitor.

Benivolè, libenter & alacriter iisdem obtemperato.

Mercedem Scholasticam liberaliter ijsacem soluito.

Erga eosdem gratus, quo ad vixeris, semper esto.

Si tenuioris fueris conditionis Præceptori hoc indicato.

*Laboret quisque, ut Præceptori scientia, vel parvenadat, vel
eo etiam superior.*

Qui castigandi aut expellendi.

*In monendis & castigandis adolescentibus absit remissio &
negligentia.*

*Adsit severitas absque crudelitate, & absque maledicto & i-
tuperatio.* (muratio.

*Discipuli à Præceptore forte cæsi, vel admoniti, ne obmur-
Contumaces ac impij in Præceptorem, in aliorum exemplum
caduntor.*

Qui castigati se non correxerint gymnasio statim eiciuntor.

*Qui Præceptores suos contempserint in omni proborū cætu
exibitantur.*

Qui eorundem obrectatione sibi famam quarunt, turpissimè semper extiterunt, turpiterque non raro ex hac vita decedunt.

TABVLA X.

Leges in hominùm congressu.

De statu corporis.

Quoties te alloquitur quispiam honoratior, sit animus presens.

Vestis ad decorum componatur, & te in rectum constituat corporis statum.

Aperi caput, sint iuncti pedes, & quieta manus.

Pileum inter loquendum utraque teneto manus.

Oculi sint verecundi, placidi, simplices, & in eum semper intenti cui loqueris.

Risus nec frequens sit, nec immoderatus, ut in cachinnum abeat.

De Sermone.

Sermo tuus lentus esto, & explanatus.

Non præceps, vel mentem præcurrens.

Non immodicus, nec nimium rarus.

Non asper quoque vel rusticanus.

Non immodestus, incivilis vel imperitus.

Interrogatus responde paucis, verecundè, & reuerentior.

Absoluto responso modicè flectes alicuius genu.

Honorificum eius titulū quem alloqueris subinde repetito,

Hunc si forte nescias, ignoti sint domini, & ignote domine.

Non abeas, nisi aut veniam præfatus, aut ab ipso dimissus.

Postremo in omni congressu familiari, sermo sit de rebus honestis, aut utilibus.

Sit Latinus, verecundus, & liberalis.

Malorum familiaritates, & consuetudines fugito.

Qui secus fecerit castigatur.

De Affabilitate.

In Minores præbeto te comem.

Et in Maiores reuerentem.

In pares facilem, ac tractabilem.

Breuitè in omnes, qualem cupis Christum erga te.

De rebus arcanis.

Arcanum tibi creditum, ne diuulgato.

Nec id cuius temerè concedito.

Nullius litteras, vel arcam limis intuetor.

TABVLA XI.

Leges de habitu Corporis

De Oculis & Vultu.

[Oculis

Puerorum animus re- [&
cer potissimum in [Vultu.

Oculos igitur habeto Puer verecundos ac placidos.

Non vagos, aut multum volubiles.

Non stupentes etiam aut limos.

Non innuentes, nec immodicè diductos.

Supercilia pueri sunt exporrecta:

Non sublata, aut depressa in oculos.

Frontis hilaris sit & explanata.

Non torua aut in rugas contracta.

A naribus pueri absit macor.

Qui, cū est opus, strophio excipiatur anverso partē corpore.

Quod in terram reiectum est, pede est ilico proterendum.

Cum incidit forte sternutatio, corpus civiliter auertito.

Deinde pileo sublato, salutanti agantur gratia.

Oscitatio cum urget, strophio aut manu os tegito.

Mox Crucis imagine te obfigrato.

Labrum inferius superioribus dentibus ne premito,

Nec superius mordeto inferioribus.

Aerius exspuito, quodque in solum deiectum est, aut pede proteratur,

Aut linteo sputum excipito.

Os tuum quotidie mane aqua proluito.

Impexo Capite prodire caueo.

De Corporis cultu.

Cultus corporis, nec sordibus esto notabilis,

Nec luxum, aut fastum præ se ferens,

Nihil is habeat militare; nihil molle, aut dissolutum,

*Sed honesto & mundo potius utitor, quam splendido, vano,
aut exotico.*

Mediocritas & Decentia plurimum in eo commendantur.

T A B V L A XII.

Leges in Mensis & Conuiujs.

Ante Mensam.

S*i tui sit munus adornare Mensam, id hoc ordine facere memento.*

Primo, mensa imponatur Mappa:

Deinde, Salinum, proximè Orbes:

Postremo, Panes & Pocula.

Dum

Dum verò aufertur, hunc ordinem teneto.

Primum Orbes colligantur.

Posthac Sal, Cascus, & quidquid spectat ad mensam secundam.

Postremo cum pane remouebitur Mappa.

Iussus consecrare mensam, vultu, manibusque ad religionem compositus, conuiuij spectato primum.

Benedictionis verbis, & gratiarum actionis attentum se quisque prabeat.

Ad nomen IESV Matrisq; Virginis, utrumque genu flectito.

In cenaculo sumptum seruetur silentium, nisi forte loqui necessitas urgeat.

Cum honoratioribus accubiturus pileum relinquito, nisi forte cuiusquam auctoritas aliud præcipiat.

Ad mensam maiorem, nisi iussus non accedito.

Ibique tum extremo loco standum sedendumue, reiecto capite.

Ad digniorem locum inuitatus, id comiter excusato.

Sed si serio quis iubeat auctoritate præditus, verecundè obtemperato.

Si tuum sit mensæ ministrare, a stabis erectus iunctis pedibus.

Solicitus semper esto, ne quid forte mensæ desit.

Si quid infundendum, tollendum aut apponendum, civiliter id facere curato.

In Mensa.

Accumbens verò mensæ, utramque manum super mensam habeto.

Corpus a quo libramine sit erectum.

A dextris sit poculum, & culter escarius; Ad leuam panis.

*Mantile si datur, aut humero sinistro, aut leno imposito
brachio.*

Caput inter epulas numquam scalpito.

Cogitabundus in mensa ne accumbito.

*Sic te hilarem præbeto, ut semper memineris, ætatem quid
deceat tuam.*

De Cibo.

Postremus omnium admoneto manum patinæ.

Ex toto disco quod placet, ne eligito:

Sed quod forte ante te iacet sumito,

Si quis cibum porrexerit lautiozem, modestè recusato.

Si instabitur, tribus eum accipiens digitis, gratias agito.

*Resecta portiuncula, reliquum vel in discum reponito, aut
proximè dato accumbenti.*

Quod digitis accipi non potest, quadra memento capere.

Digitos nec ore prelingito, nec tunica extergito, sed mantili.

Integros bolos subito ne deglutito.

Semesa abs te alteri ne porrigito,

Panem prærosus in ius iterum ne immergito.

Ossa dentibus ne arrodito, sed cultello purgato.

Faciemq; post in angulum quadre tue seponito.

*Canibus de mensa ne quid porrigito, nec eosdem accumbens
contrectato.*

Sumpturus Ovum, panem prius frustulatim conscindito:

Cui putamen cultello, non unguibus, decenter repurgato.

Salim non digitis, sed cultello, quantum est satis, capito.

Si longius abest salinum, porrecta cum quadra sumito.

De Potu.

Si quis præbibeat tibi, hilariter illi bene precator.

Si non sitis, labijs cyathum tamen admoneto.

Labra cum biberis mantili seu linteolo abstergito.

Cibum

Cibum antequam bibas præmandito.

Inter bibendum alios intortis oculis ne intueor.

Nec cervicem in tergum exhausurus poculum reflectito.

Bis in convivio, aut ter ad summum, modicè sorbens bibito.

De Verbis.

Cum maioribus accumbens, non nisi rogatus loquitor.

Compellatus non ante respondeto, quàm cibum deglutieris.

Nec cibum appositum, nec potum vituperato.

Absentium famam, nec istic, nec alibi ledito.

Lepide dictis non nisi modicè puer arrideto.

Nihil quod offuscet hilaritatem illic effunito.

Si quid à quoquam rusticius dicatur, dissimulato.

Si quid obscœni, quasi non intellexeris, te componito.

Quod dicitur in Mensa, sub dium ne raptato.

Sed inscribendum id vino potius ducito.

Post Mensam.

Temperantiæ & honestatis memor, citra plenam saturitatem corpus reficito.

Cum senseris igitur naturæ satisfactum, sublata quadra flexoque poplite, clam aut salutatis convivis à Mensa te subdicito.

Mox ad Mensam reuersus, si sit opus, ministrato,

Vel reuerèter Mensæ assistens, si quis quid inbeat, expectato.

Emuncturus candelam è Mensa prius tollito.

Quod emunctum est, protinus aut arena immergito, aut solea proterito.

Si quid alicui vel porrigendum vel infundendum, lena id facias caueto.

Iussus agere gratias in rectū corporis statum te componito, vultūq; ad convivio præidentem reuerenter verito.

Has duodecim Tabularum Leges, quilibet amore honesti potius, quàm pœnæ timore, vt obseruet, curato.

Lex vna generalis.

Omnis honesta & laudabilis consuetudo, pro Lege ab omnibus habeatur & obseruetur.

FINIS LEGVM XII.

TABVLARVM.

BREVIS-



BREVISSIMA IN LEGES XII.

TABVLARVM

Scholia

Quibus certorum librorum indicantur Capitula, quæ Præceptoribus inexercitatis adhuc, & in hac docendi prouinciam iam primum admissis, ad vtilē harum legum explicationem, & Puerorum studium quàm maximè in litteris & pietate promouendum, adiumenti non parum attulerint, & vtrisque longissimi & optimi commentarij loco fuerint.

IN TABVLAM I.

DEVM in primis litterarū studiosis piè colendum esse, diligendum adhuc, & timendum multis in locis accuratè docet libellus inscriptus, *Thesaurus piarum Institutionum* in vsum pueritiæ Christianæ nuper à Societate Colonienſi pulcherri-
mè digestus.

Idem non minus methodicè docent *tres Institutionum Scholasticarum libri*, qui nuper etiam ex officina Antuerpiani Typographi Ioannis Belleri in publicum prodierunt.

Ex his duobus potissimum (ne quis Magistrorum fortassis multis coemundis queratur se nimio grauari sumptu) hæc Scholia nostra depromemus, & ne multis adiectis, libellus in librum extendatur, & præcium fiat graue discipulis, locum duntaxat commonſtrabimus, quibus Præceptores plerasque leges plurimum queant illustrare, & Discipulis easdem commendare.

In Pueris rectè & piè instituendis, primū omnium Religio-
nis & morū; Deinde Doctrinæ & studiorū haberi debet ratio.

Esse autem vana, ne dicam non rarò pernicioſa, politiorũ litterarum ſtudia, abſque vera & orthodoxa Religione, cum aliunde, tum ex documentis paulò inferius ſubiectis euidenter & perſpicuè cognosci poteſt.

Ad omnem verã rectam & Chriſtianã Inſtitutionem, plurimum contulerit, inferere ſtatim puerorũ mentibus Timorem Domini, qui, vt Regius Prophetæ Dauid ait, initium eſt Sapientiæ. Quæ de re vide Claſſem tertiam, primam libri tertij Inſtitutionum Scholaſticarum.

Ad pulſum igitur campana Matutinum, &c. Quid moneat quotidianus ille triplex campanæ pulſus, optimè docebit Theſaurus piarum Inſtitutionum capite 23. Partis primæ, & tertius Inſtitutionum Scholaſticarum liber Claſſe 7.

I De ſanctorum Vita, &c. Sancti alicuius vitam cognoscere cupiens, conſulat Compendium Hiſtoriæ ſanctorũ Aloyſij Lippomani Episcopi Veronenſis, vel Laurentij Suriij, aut vſuardi Sanctorum Hiſtoriam, vel denique Eccleſiæ Romanæ Martyrologium, Venetijs nuper per Petrum Galeſinum in lucem editum.

Pijs ante omnia, &c. De pijs Precibus & earum attentione: De cauendis in ijs mentis diſtractione, & aptis remedijs; Denique de corporis in ijsdem ſitu, vide Theſaurum partis 1. capitibus 12. 13. 14. 15. 16. 17. & 18.

Et Claſſem 6. & 5. libri 3. Inſtitutionum Scholaſticarum.

Vitæq; & Paſſionis, &c. Vitæ & paſſionis Chriſti Meditationes maximè ſalutares ſuppeditat Theſaurus Partis. 1. capite 27.

Et liber tertius Inſtitutionum Scholaſt. Claſſ. 4.

Aut alijs ſanctorum Patrum, &c. Inter huiusmodi Chriſtiænæ pietatis libellos primas meretur ille verè aureus Thomæ à Kempis de Imitatione Chriſti libellus.

Proximæ, libelli Confessionum beati Auguſtini.

His addas licet exercitationes Nicolai Eſchij.

Conciones ſacras Adami Sasboldi Delphenſis.

Hiſtoriam Barlaam & Ioſaphat, Ioan. Damasceni.

D. Hiero-

D. Hieronymi Epistolas per P. Canisium selectas.

Horum & similium lectio, regiam docebit viam, quæ nos sola ducit ad æternam cælestemq; Beatitudinem; præ cuius amore & desiderio, meritò sordere debet, quidquid fallax hic mundus, quantumvis excellens, magnificum, aut delectabile pollicetur.

Verbum Dei diligenter, &c. De audiendo diligenter verbo Dei. Thesaurus partis 1. capit. 12.

Et institutiones Schol. libri 3. Classe 4.

In primis vero sacrificio, &c. Scholia de Missæ Sacrificio, vide proximè sequenti tabula, ibi. *De Missa* & p̃ys sub eadem praeibis.

De confessione, &c. De modo rectè instituendæ Confessionis, & cordis Contritione.

De certis Confessionis conditionibus, & de medijs emendationis Thesaurus partis 1. capite. 2.

Et Institutiones Schol. libri 3. Classe 6.

Examinandæ cōscientiæ rationē, Thesaurus par. 1. cap. 2. & 4.

De poenitentiae effectibus, Thesaurus, partis 3. cap. 6.

Et Institutiones Schol. libri 3. diuersis Classibus.

De præparatione ante confessionem, Thesaurus part. 1. cap. 5

Et Institutiones Schol. libri 3. Classe 4.

De generalis confessionis vtilitate, Thesaurus part., 1. cap. 5.

De quorumvis peccatorum fuga. Institutiones Scholasticæ libri 3. Classe 6. & sequentibus.

Qui aetatis fuerint, &c. Modum præparandi se ad sumendam S. Eucharistiam. Thesaurus part. 1. cap. 6.

Ibidem de ijs quæ ante & post communionē sunt necessaria.

De frequenti communione, Thesaurus part. 1. cap. 7.

De multiplici S. communionis fructu & vtilitate: Institutiones Schol. libri 3. classe 2. & 1.

Nulli hominum obrectato, &c. De obrectatione, Institutiones Schol. libri 3. classe 5.

Remedia vero aduersus obrectationis vitium Thesaurus partis, 2, cap. 4.

Contentiones, &c. Remedia contra iram, Thesaurus part. 2. capite 9.

Iusiurandum, &c. Remedia contra pessimam iurandi consuetudinem Thesaurus partis. 2. capite 2.

Turpis loquium & Fornicationem, &c. De fugiendis omnibus luxurię incitamentis, Thesaurus partis, 2. cap. 7.

De iisdem, & non legendis Hæreticorū libris, vidē Institutionum Scholasticarum librum, 1. sub finem.

Remedia ad orthodoxam fidem conferuandā, Thesaurus, partis 2. capite 1.

IN TABVLAM. II.

Templum ingrediens, &c. Precationem hanc. *Aufer à me quæso, &c.* Et reliquas mane, meridie & vesperi à Scholasticis piè legendas inuenies in his nostris Precationum libellis, Antuerpiæ à Ioanne Bellerio excusis.

In libello Precationum Scholasticarum. capite 1.

In libello Precationum Liturgicarum, in principio.

In Precationum piarum Enchiridio, capite 1.

Templo conueniunt, &c. Velim legant hoc loco primæ, ac rudioris ætatis Institutores, quæ scripsimus Institutionum Scholasticarum capite, 4. libri 1.

Et Classe 7. & 5. libri 3.

De Missa & pñs, &c. De modo ipsius Missæ quotidie aut certè frequenter audiendæ, Thesaurus part. 1. capite 9. & 10. Institutiones verò Scholast. libri 3. Classe 7.

Breuem quoq; omnium totius Missæ partium explicationē vide in Thesauro partis 1. capite 11.

Sacerdoti facturo, &c. De officio ministrantium in Missa Sacerdotibus, Institutiones Scholasticæ libri 3. Classe 7.

Qualibet sub Missa sacrificio, &c. De necessaria pueris orandi consuetudine, Institutiones Scholasticæ libri 3. Classe 6.

Remedia contra Acediam, Thesaurus partis 2. capite 11. Quæ in Templo legēdæ Precationes, Institutiones Scholasticæ libri 3. Classe 7. & sequentibus.

Vsum Rosarij seu Coronę vide in Thesauro piarū Institutionum

tionum partis 1. capite 21.

IN TABVLAM III.

In utroque Chori latere, &c. De constituendo Choro & eius officio, Institutiones Scholast. libri 3. Classe 7.

De Ecclesiastico Cantu, &c. Institutiones Scholasticę libri 2. Classis 6. capite 7.

De Ecclesiasticis Supplicat. quas vulgò Processiones vocâr, Thesaurus partis 1. capite 19.

IN TABVLAM IIII.

Sed libro statim explicato, &c. De utili modo examinandę in quouis Classe Lectionis, vide

Instit. Scholast. lib. 2. Classis	{	6	} Capite	{	3
		5			4
		4			3
		3			3
		2			2
		1			2 & 3.

Ediscenda, &c. De ediscendo & excolendâ Memoria confule

Instit. Scholast. lib. 2. Classis,	{	6	} Capite	{	4
		5			5
		4			4
		3			4
		2			4

Hic Verò pro delictorum, &c. De puerorum delendis multis, liber 1. Institit. Schol. capite 3.

De lectionibus, &c. Vide in primis librum 1. Instit. Scholast. capite 6. sub finem.

Lectionis verò à Præceptore rectè explicandę rationem legat qui volet

Instit. Scholast. lib. 2. Classis	{	5	} Capite	{	3
		3			2
		2			2
		1			2

In recitanda lectione, &c. Hac de re vide librum Instit. Scholast.

40 LEGES SCHOLASTICÆ
Scholast. 2. Classis 5. capite 6.

De exercitatione styli, scribendisq̃ nunc Epistolis nunc Carminibus vide.

Instit. Scholast.	{ 5 }	} Capite {	10
lib. 2. Classis	{ 4 }		5. 6. 7.
	{ 3 }		5. 6.
	{ 2 }		4. 5. 6. 7.
	{ 1 }		4. 5.

Et postremò scitè, &c. De Epistolis alijsq̃ dictatis scitè pingendis lib. 2. Instit. Schol. Classis 6. capite 9 & 10. Et classis 5. Capite 11.

De Disputatione vide

Instit. Scholast.	{ 6 }	} Capite {	6
lib. 2. Classis.	{ 5 }		8
	{ 1 }		7

Loquendum Latine, &c. De Latino sermone perpetuo vsut. pando, vide Instit. Schol. librum 1 capite 17 adhuc

Instit. Scholast.	{ 6 }	} Capite {	8
lib. 2. Classis	{ 5 }		9
	{ 4 }		8

IN TABVLAM. V.

Rem vèro alienam, &c. De restitutione rerum casu inuenturum, liber 3. Instit. Scholast. Classe 5.

De Societate deligenda, liber 3. Instit. Schol. Classe 2.

IN TABVLAM VI.

Præces Vespertina, Meridiana, & Matutina petantur ex Precationum libellis de quibus initio Scholij in Tabulam 2.

Vide etiam vesperi incumbendi modum in Thesauro parte 1. capite 24.

De studio Verecundia, Instit. Scholast. lib. Classe 5.

De muniendo se signo Crucis, vide Thesaurum partis 3. capite 2. & 3.

De studio & tota exanimandæ Lectionis ratione, vide librum 2. Instit. Schol. diuersis Classib. 6. 5. 4. 3. &c. cap. 3. vel 4. Tum etiam libri 1. capite 14.

De præ-

De privata autem Lectione, vide

Instit. Scholast. lib. 2. Classis	}	Capite	5	13
			4	8 & 9
			3	8
			2	10
			1	10

De vitando otio, &c. vide lib. 3. Instit. Schol. Class. 2.

De Lectionib. repetendis Instit. Schol. lib. 2. Class. 6. capite 7. & 14.

IN TABVLAM VII.

De exhibenda Reuerentia, &c. De honore Parentum & superiorum, vide Thesaurum partis 2. capite 3.

Item partis 2. capite 12. Numero 3. & 4.

Vixissem ac matronis, &c. Videlib. 3. Classē 5. sub finem.

IN TABVLAM VIII.

De lusu seu studiorum remissione vide Instit. Scholast. lib. 1. capitibus 15. 16. 17. 18. & 19.

In lusu & animi remissionib. adhibenda esse semper aliqua Pietatis virtuti q̄; incitamenta, docet liber 1. Institut. Scholast. capite 19.

In iisdem & aliis, &c. Instit. Schol. lib. 1. capite 9. & 17.

Qua in lusu cauenda, &c. Instit. Schol. lib. 1. cap. 17. & 19. Et liber 2. Classis 5. capite 9.

De ludis illicitis, lib. 1. Institut. Scholast. capite 19.

IN TABVLAM IX.

Quid suis quisque debeat Præceptoribus, Thesaurus partis 2. capite 3.

Et liber 1. Institut. Scholast. capite 6.

Mercedem scholasticam, &c. De Discipulorum erga Præceptores gratitudine, Institut. Scholast. lib. 1. capite 9.

Discipuli à Præceptore, &c. Institut. Scholast. lib. 1. cap. 21.

Qui castigati se non, &c. Instit. Schol. lib. 1. capite 6. & 20.

IN TABVLAM X.

Quoties te alloquitur. Vide Institut. Scholasticarum librum 2. Classis 7. capite 22.

IN TABVLAM XI.

Mediocritas & Decentia, &c. Institut. Schol. lib. 2. Classis 7. capite 22.

Remedia vero contra inanem gloriam, Thesaurus partis 2. capite 5.

IN TABVLAM XII.

De morum Civilitate liber 2. Institut. Schol. Classis 7. capite 22.

Ibique pleraque de cauendis in cibi potusque sumptione, Repletionem: Remedia verò contra Gulam, Thesaurus partis 2. capite 10.

DOCV.



Documenta non nulla,
quæ studiosis ad Christianæ pietatis institu-
tionem plurimum conferre queant.

I.

XII Signa proborum adolescentum.

I. *Rebus sacris crebrò interesse cum magna attentione & reuerentia.*

II. *Ad nulla se recipere diuerticula, non amare secessus, aut ullas locorum latebras.*

III. *Nusquam libentius versari, quàm in conspectu Parentum, vel Præceptorum.*

IIII. *Parentes & Præceptores summè reuereri, & increpationem eorum non aspernari.*

V. *Libenter agnoscere suam culpam, nec ullum delictum coram Præceptore inficiari.*

VI. *Malle se potius cadi, quàm mentiendo, vel inficiando Deum offendere.*

VII. *Probis & honestis adolescentibus semper se comitem adiungere, vel socium.*

VIII. *Malorum consuetudinem, colloquia, consilia, non secus, quam pestem, denitare.*

IX. *Nulli obirectare, nullum cadere, irridere, laceessere, aut quoquo modo offendere.*

X. *Præbere se domi hilarem, foris compositum, & omnibus affabilem.*

XI. *Quod Schola, Præceptori, aut familia possit esse dedecori, superiori libenter id indicare.*

XII. Et cum omnibus, vel multis anteferendus sit, se ipsum tamen præferre nemini.

II.

Eruditio cum virtute coniungenda.

Eruditio inter ea bona est reponenda, quæ per se nec laudanda sunt, nec vituperanda.

Unde qui eam Virtute coniunxerit, nihil rebus humanis utilius, vel magis necessarium, nihil præstabilius, gloriosius, vel laudabilius.

Contrà verò Eruditione à Virtute seiuncta, nihil esse, vel fingi funestius, aut perniciosius potest.

Unde & Fabius de Eloquentia, si vis illa dicendi, inquit, malitiam instruxerit, nihil est publicis privatisque rebus perniciosius Eloquentia.

Nos ipsi, qui pro virili parte conferre aliquid ad facultatem dicendi conati sumus, pessimè meremur de rebus humanis, si latroni comparemus hæc arma, non militi.

Multos nasci, & egere omni ratione satius fuisset, quàm providentia munera in mutuam perniciem convertere.

III.

De gemino, eoque salutari studiorum fine.

Studiorum nostrorum ac Eruditionis, geminis hic finis est	{	Honor Dei
		Salus animarum.

Omnis nostra Eruditio eò referri debet, ut ipsius adminiculo ad Dei Servatoris nostri salutem facilius ac certius peringamus.

Eiusque iam cogniti, iustè, piè, & sanctè vivendo honorem, & gloriam pro virili quisque parte promoveamus.

Proximum hinc est, ut animarum salutem, tum in nobis, tum in proximis sedulo procuremus.

Christus

Christus enim non vult talenta singulis concedita defodi in terram, ubi nec nobis, nec alijs profint.

Sed vult ea diligenter expendi in Dei Patris sui gloriam, & ad salutem proximorum.

Quod quisquis fecerit, audiet à Domino; Euge serue bone, quia super pauca fuisti fidelis, super multa te constituam, intra in gaudium Domini tui.

IIII.

Quæ vera hominis Beatitudo.

Vera Beatitudo est { Deum nosse, timere, & colere.
In eius lege versari die ac nocte.
Celestia semper & ubique querere.
Humana despiciere, & pro nihilo habere.

Hæc veræ, & Christianæ Beatitudinis summa est quam ipse nos docuit Dei filius, quando illos Beatos appellavit, quibus Paupertas, Luctus, Mansuetudo, Misericordia, Benignitas, cordi essent,

Quod hæc videlicet ad æternam Beatitudinem nos dirigant, promoveant, ac perducant.

Falluntur proinde, qui eam in Honoribus, Opibus, Latifundijs, magnificis edificijs, aut in bene instructa suppellectile, in Otio & mollibus plumis;

Aut in Corporis voluptatibus, ceterisque rebus caducis ludibrioque fortuna expositis constituerunt.

Qui quidem error nascitur in hominum mentibus ex ceca quadam Iudiciorum depravatione, quod non talem rem unamquamque æstiment, qualis ipsa est.

Ex quo multa absurda consequuntur, ut nimirum vilia sectemur tamquàm preciosa, preciosa vero, ut vilia reiciamus, ut laudanda vituperemus, & laudemus vituperanda.

V.

Fortunæ bona quæ rectè expetere liceat.

Principio, si Diuitias dicamus, *ys non carere, quæ ad vitam tuendam sunt necessaria.*

Honorem verum existimemus, *venerationem ob ipsam virtutem.*

Voluptatem puram ac solidam ex *ys capi, quæ spectant ad animum.*

Nobilitatem, à bonis progeneratam, præbere se quoque ipsorum similes.

Potentiam ac regnum, multos habere quibus rectè consulas.

Eruditionem superuacaneam esse, nisi per eam vitium cognitum facilius fugiamus: virtutem vero persequamur, ac teneamus.

Vitam nostram Peregrinationem, multis casibus obnoxiam, cui nulla non hora immineat finis, qui leuissimis de causis possit accidere.

In hac peregrinatione, quo quis paucioribus implicetur sarcinis, hoc leuius ac incundius, hoc iter suum conficere.

Ea verò humani corporis natura est, ut paucissimis egeat, adeo quidem, ut eos haud dubiè insanæ damnet, qui tantis laboribus tam multa parare studeant, cum tam paucis sit opus.

Diuitiæ & possessiones in usum tantum comparantur, quem non adiuvant immense opes; sed opprimunt, ut nānem ingentia onera.

Nec aurum, si non utare, à cæno differt, nisi quod magis angit eius custodia, & efficit, ut dum huic uni studes, ea negligas, quæ maximè sunt homini curanda.

Culta vestimenta, quid aliud sunt, quàm superbiæ instrumentum.

strumenta? Vile indumentum excogitavit Neceſſitas, precioſum Luxus: elegans Vanitas.

Suborta iam eſt in veſtitiu contentio, quæ multa docuit ſupernacanea & damnoſa, dum homines ex eo quod inſormitatem noſtram arguit, etiam honorem captant.

Ita Diuitiarum pars maxima, AEdificia, Supellex numeroſa & opulenta, Gemma, Aurum, Argentum, ornamentorum omne genus, ſpectantium oculis magis comparantur, & exponuntur, quàm poſſidentium uſibus.

Forma verò ipſa, quid hac aliud eſt in humano corpore, quàm cuticula bene colorata? quæ, ut floſculi, celeriter marceſcit, ut vel una febricula, formam, vires, robur, & corporis agilitatem ſæpe numero concutiat, deformet & debilitet.

Honores denique & Dignitates, quæ ab hominibus vel maximè omnium appetuntur, quid aliud ſunt quàm ſplendida quadam miſeria, & perſonata felicitas?

Quid ipſæ corporis voluptates? quæ ea viles ſunt & pecudina?

Quot quantaque mala ea nobis accerſunt?

Corpori frequenter morbos; animo Pœnitentiam;

Ingenio hebetudinem, menti cecitatem;

Dedecus adhæc & ignominiam;

Et expertes ſunt nunquam amaritudinis.

Corpus poſtremo, quo curatius fuerit, hoc animus fere neglectior, quòque mollius habetur, hoc acrius menti reſiſtatur: Et ſæpe, ut equus delicatè paſtus, ſeſſorem ipſum excuſit.

VI.

Salutares varijs de rebus admonitiones.

Prima Chriſtianæ Religionis ſemina ſunt.

Deum eſſe ſuper omnia metuendum & amandum.

Qui condidit, restituit, & gubernat vniuersa.

Nusquam non præsens; Nihil non vident, nihil nesciens.

*Hunc per Filium suum Iesum, sibi fidentibus, & ipsius
Præcepta seruantibus detulisse vitam æternam, & vni-
que per Spiritum sanctum habitare in cordibus piorum.*

*Deum autem, ut est remunerator omnium bonorum;
ita & malorum omnium ultorem esse.*

*Itaque nulli perire premium recte factorum, etiam si
apud homines, pro benefactis jape redduntur mala.*

*Neininem prorsus, quantumvis occultè peccet, Dei vin-
dictam posse effugere, nisi resipiscens, semet illi reconciliet.*

*Sic autem inferatur nomen Iesu mentibus piorum, ut
quàm maximè fiat amabilis illorum affectibus.*

*Deinde persuadeatur & hoc, semper adesse Pueris An-
gelos testes ac spectatores omnium quæ geruntur aut etiam
cogitantur.*

*Hos delectari Pudicitia, Modestia, Sobrietate, Cari-
tate, Concordia; Diuersis verò ac contrarijs offendi.*

*In quibus verò ipsi viderint Virtutes has superiores, ijs
multa bona conferunt à Deo, quo magis proficiant.*

*His proximum, ut de sacris scripturis, quam reueren-
tissimè sentiant, in his enim Deum velut ex oraculo perpe-
tuò loqui mortalibus.*

*Hanc reuerentiam, magis imbibent, si viderint sacris
codicibus haberi honorem.*

Si consuescant exoculari codicem Euangelicum.

*Adhæc, si de diuinis Litteris nunquam fiat sermo per
iocum aut per contentionem; sed sobrie, ac reuerenter.*

*Discant contemplari Cælorum ornatum, Terræ diui-
tem prouentum.*

Fontium scatebras, animantium innumeras species.

Discant

Discant quæ Deus largitus est, & largitur quotidie per filium suum unicum, & Spiritum sanctum.

Puerorum auribus insonandum frequenter, quæ præmia maneant pios, quæ item impios supplicia.

Admonendi, ut sæpe cogitent, quid in Baptismo professi sint, ne descendant ab imperatore Christo, cui nomen dederunt.

Adhæc sedulo dent operam, ut vestem quā acceperunt candidam, immaculatam conseruent.

Admoneantur, inter omnes Christianos arctissimam esse cognationem, qualis est inter eiusdem corporis membra.

Ideo spectat, ut consuevant omnem Christianum fraternam quadam caritate venerari, ob hoc ipsum quod Christianus est.

Intelligent etiam Christum, & laci in suis membris, & in yisdem refocillari.

Discant neminem esse, aut esse posse miserum, qui manet in Christo, sine contingant aduersa, sine prospera; sine mors, sine vita.

In rebus tristibus agendas esse gratias Deo, qui nostra salutis causa flagellat nos; in laetis non insolescendum.

Admoneantur, qualiter se gerere debeant erga Parentes, erga Seniores, erga Aequales, erga Inferiores.

Aiuescant non fastidire pauperes;

Comesint erga Pares;

Reuerentes erga Seniores;

Pij erga Parentes.

In horum quemuis quidquid officij præstiterint, sciant se Deo fœnerari, cuius præceptis, hæc facientes, obtemperant.

Exempla virtutum potissimum illis proponantur ex vita Christi,

Christi, Sanctorum Patrum, aliorumque piorum hominum.

Admoneantur quàm turpe sit invidere cuicumque aut irasci.

Quàm honesta res sit habere linguam parcā, sobriam, ac circumspēctam.

Non temerè loquendum, nisi res postulet,

Nec respondendum ad quidquā, quod non intelligant.

Nihil autem turpius esse, quàm falsa loqui, vel aliena obrectare fama, præsertim absentis.

Hæc aliæque huius generis erumpent aliquādo in morum egregiam frugem.

FINIS.

